



## **फैसल केरों जासूसी**

**डॉ. मनाज़िर आशिक़ हरगानवी**

फैसल करों जासूसी

# फैसल केरों जासूसी

उर्दू बाल-उपन्यास केरों अंगिका रूपान्तर

डॉ. मनाज़िर आशिक़ हरगानवी

अंगिका अनुवाद

डॉ. अमरेन्द्र

प्रकाशक

एजुकेशनल पब्लिशिंग हाउस

३१०८, वकील स्ट्रीट, कूचा पंडित

लाल कुँआ, दिल्ली-११०००६

पुस्तक : फैसल केरों जासूसी  
लेखक : डॉ. मनाज़िर आशिक़ हरगानवी  
अंगिका अनुवाद : डॉ. अमरेन्द्र  
संरक्षक : मुजतबा खां  
संस्करण : ई. २००६  
मूल्य : ३० रुपये  
मुद्रक : अफीफ ऑफसेट प्रिंटर्स, नयी दिल्ली-६

---

**पुस्तक मिलने के पते**

- एजुकेशनल पब्लिशिंग हाउस, ३१०८, वकील स्ट्रीट, कूचा पंडित, लाल कुँआ, दिल्ली-११०००६
  - कोहसार, भीखनपुर-३, भागलपुर-८१२००१ (बिहार)
  - कामायनी, लाल खां दरगाह लेन, सराय, भागलपुर-८१२००१ (बिहार)
- 

FAISAL KERO JASUSI By Dr. Manazir Ashiq Harganvi  
ANGIKA TRANSLATION By Dr. Amrendra

अंगिका रौं नामी साहित्यकार आरो  
आरक्षी उपाधीक्षक  
**चन्द्रप्रकाश जगप्रिय**  
कौ ई बाल उपन्यास समर्पित ।

—अमरेन्द्र

## पहिलें एकरा पढी ला

जिन्दगी बड़डी रंगारंग के होय छै, मतरकि जिन्दगी के आयकों रंगारंग में खून, अगुवा, लूट-मार, हंगामा, परेशानी आरो नीयत रों खराबिये ज्यादा शामिल होय गेलों छै । आवै वाला दिनों में कोय न कोय घटना, कोय न कोय दुर्घटना होतैं रहै छै, जेकरों सामना हमरा सब जोगों कें करै लें पड़ै छै ।

जबे ई रं हाल रहें; हमरा सिनी कें होशियार रहै के जरूरत छै । आपनों हिफाजत वास्तें हर वक्ती चौकन्ना रहै के जरूरत छै आरो मुकाबला वास्ते कमर बाँधी कें तैयारो रहै के जरूरत छै । यही लें एकरों जरूरत छै कि हम्मैं ऊ सब के बारे में, होय वाला घटना साथें आपनों बचाव केरों बारो में पूरा पूरा जानकारी लैके कोशिश करतें रहैं ।

जिन्न, भूत, परी आरो राजकुमार केरों कहानी सिनी—जरूरे पढैं, मतरकि आय इक्कीसवीं सदी में, जबकि सब्भे दिश षडयंत्र केरों बाजार गर्म छै, तबे हर लड़का कें राजकुमार आरो हर लड़की कें परी बनाना चाही, कैन्हें कि जिन, भूत, राक्षसनी तें हमरा सिनी के आसे-पासे घूमतें रहै छै । वै सिनी सें अपना आप कें, घर कें, मुहल्ला कें, गाँव, शहर आरो मुल्क कें बचाना छै, मजकि केना ? सिर्फ आपनों आचरण सें ।

फैसल रों चरित्र हमरों कार्यवाही आचरण में मददगार बनें सकै छै । फैसल जासूस छेकै मतरकि तोरा सिनी के एकदम आपनों, जेना तोहें खुद्दे फैसल रहों आरो भेद कें जानै साथें मुकाबलौं वास्तें अपराधी के पीछा करतें रहों । साथें-साथें जुल्म अत्याचार कें खिलाफ आवाज बुलन्द करी रहलौं रहों । हमरा विश्वास छै कि फैसल केरों जासूसी तोरा सिनी पसन्द करभौ आरो ये सें बहुते कुछ सिखवो करभौ । साथे-साथ, निडर, बहादुर आरो बुद्धिमानो बनभौ । आपनों राय सें हमरों परिचित करैभौ । धन्यवाद !

—मनाज़िर आशिक़ हरगानवी

कोहसार, भीखनपुर-३,  
भागलपुर-८१२००१ (बिहार)  
फोन : ०६४१, २४२३६३३

## जासूसी उपन्यास आरो 'फैसल करो जासूसी'

'फैसल करो जासूसी' डॉ. मनाजिर आशिक हरगानवी द्वारा लिखलें बाल-जासूसी उपन्यास छेकै । भले ही अनुवाद रहें, अंगिका में ई पहिलों बाल जासूसी उपन्यास छेकै, जे अंगिका के भावी जासूसी उपन्यास-लेखन के प्रेरित करतै, बल देतै । अंगिका में तें अभी बाल उपन्यास के लेखनो ठीक से शुरू नै भेलों छै, तबें बाल जासूसी उपन्यास रों लेखन दूरे के बात छेकै । कैन्हें कि जासूसी कथा लिखवों ओत्तें आसानो नै होय छै ।

जासूसी कथा के हिन्दी में ओत्तें साहित्यिक प्रतिष्ठा नै छै, जत्तें आरो किसिम के साहित्य के । मजकि एकरा से के इन्कार करतै कि तिलिस्म उपन्यास छोड़ी के एक जासूसी उपन्यास में जत्तें औत्सुक्य के भाव रहै छै, ऊ कोय कथा साहित्य में नै आरो कि कथा साहित्य में जेकरों होना निहायत जरूरी छै । एकरों बिना तें उपन्यास कोय छूवों नै करतै—ऊ कत्तो ज्ञान के भण्डार कैन्हें नी रहौक ।

ई बात विद्वानों के थोड़ों अकबकावें पारें, जो हम्में ई कहियै कि जासूसी उपन्यास लिखवों प्रचलित उपन्यास-लेखन से ज्यादा श्रमसाध्य छै आरो टेढ़ों, ई यै लेली कि सामान्य उपन्यास में ढेर सिनी बात शुरू होय छै, आरो ढेर सिनी छुटी जाय छै, ओकरा से नै तें उपन्यास पर कोय विशेष

फरक पड़े है, नै पाठक पर, मतरकि जासूसी उपन्यास में है सब नै होय छै । आरम्भ में जे कुछ बात जासूसी उपन्यासकारें उठावै छै, ओकरा अंत तांय लैयो जाय छै, आरो चूँकि ई किसिम के उपन्यास ज्यादातर हत्या हेनों घटनाहै पर गढ़लौ जाय छै तें यहाँ हेनों नै होय छै कि सब रहस्य एकबारिये आखरिये में जाय कें खुलै छै । यहाँ घटना-विन्यास कुछ हेनों होय छै कि उपन्यासकार घटना के रहस्यो पर सें कुछ-कुछ पर्दा बीचौ-बीचौ में उठैतें चलै लें, ताकि कथारस हौले-होले घन्नों होलौ जाय । आरो आखिर में उपन्यासकार कें सब पात्र आरो घटना कें समेटी कें घटना के रहस्य कें खोली कें राखी दै लें पड़े छै । जाहिर छै कि यै कामों में उपन्यासकार कें आपनों दिमाग कें एकदम सचेत बनैलें राखै लें पड़े छै । एक जासूसी उपन्यास में घटना जरूर उलझलौ रहै छै, पर ऊ बड़ा तेजी सें रहस्योद्भेदन दिश बढभो करै छै, यही लें प्रासंगिक कथा आरो बेमतलब के पात्र के यहाँ जरूरते नै रहै छै, जे उपन्यास के गति में बाधक बनें ।

एक जासूसी उपन्यास के शिल्प-विधान कें समझै लेली डॉ. मजाजिर आशिक हरगानवी के बाल जासूसी उपन्यास 'फैसल केरौ जासूसी' पढ़ी लेवौ ही काफी होतै ।

ई संबंध में एक बात आरो हममें कहे लें चाहवै कि जे पाठक हेनों उपन्यास में कोय महान सामाजिक उद्देश्य, मनोवैज्ञानिक सत्य आकि महान पात्र के तलाश करै लें चाहै छै, हुनी जासूसी उपन्यास कें नै छूऔ । एक जासूसी उपन्यासकार महान पात्र कें गढ़ै लेली उपन्यास लिखवो नै करै छै । यै में मुख्य पात्र जासूस के एक्के काम होय छै कि वैं आपनों बुद्धि सें अपराधी आरो अपराध के ढंग कें खोजी निकालें, जे उपन्यास में कुछ हेनों ढंग से छिपलौ रहे छै कि पाठक ओकरा जानै लें एकदम बेचैन होय जाय । जे जासूसी उपन्यास में है गुण छै, वहे सफल जासूसी उपन्यास ।

'फैसल केरौ जासूसी' के सफलता केरौ रहस्यो यहे छेकै । 'फैसल केरौ जासूसी' पढ़लें जा, यै में कोय हेनों चीज नै मिलतौं, जे भूत-प्रेत के खेल लगें । जे टा घटना घटे छै, केकरौ पर विश्वास नै करै के कोय सवाले नै छै । घटना के यहे विश्वसनीयता जासूसी उपन्यास कें स्वाभाविक जीवन दै छै; जीवन आरो जगत सें ठीक-ठाक जोड़े छै । कथा आलोचक वैलेन्टाइन विलियम्स ने भी जासूसी उपन्यास के एक प्रमुख विशेषता एकरौ घटना के



विश्वसनीयता के ही मानलें छै ।

‘फैसल केरौ जासूसी’ के अंगिका में अनुवाद करे के योजना यहू लेली बनलै कि यहाँ हेनो कोय बात नै छै, जे समाज या बाल-स्वभाव के विकृत करै के मंसा राखै । होन्हो के एक सच्चा जासूसी उपन्यास केरौ लक्ष्य ई होभो नै करै छै—कोय्यो जासूसी उपन्यास के उठाय के देखी लेलौ जाय । वहू में डॉ. मनाजिर आशिक हरगानवी ने तें ‘फैसल केरौ जासूसी’ के लेखकीय वक्तव्ये में साफ-साफ लिखी देनै छै कि ई बाल जासूसी उपन्यास रौ लेखन के पीछू आयको संघातिक परिवेश रौ प्रति बच्चा के सावधान करवो छेकै ।

‘फैसल केरौ जासूसी’ कथाकार हरगानवी के द्वारा लिखलौ उपन्यास सें अधिक खोजी पत्रकारिता के एक मंजलौ पत्रकार डॉ. हरगानवी के, सब किसिम सें पूर्ण आरो चकराय दै वाला रिपोर्ट छेकै । आखिर एक जासूसी उपन्यास तें अंतिम रूपौ सें एक मंजलौ पत्रकार आरो लेखक द्वारा सनसनीपूर्ण घटना के रहस्योद्घाटने नी छेकै ।

सम्पादक : वैखरी  
लाल खां दरगाह लेन, सराय,  
भागलपुर—812002 (बिहार)  
मोबाइल—9939451323

—डॉ. अमरेन्द्र  
शुक्रवार, २४ जुलाई २००६

## फैसल करों जासूसी

फैसल जासूस छेकै । आबें ऊ बड़ों होय गेलों छै । साथें-साथें ओकरो कारनामो ओत्ते आश्चर्य पैदा करै वाला । अपराधी कें पकड़ै के ओकरो अलगे अन्दाज छै । ओकरो सोचो अलग । सबसें पहिलें ओकरो बचपनों रों एकठो किस्सा सुनों ।

लंच के छुट्टी जेन्है खत्म होलै तें, लड़का सिनी फेनू आपनों जमात में आवी गेलै । पढ़ाय शुरू होय गेलै । तभिये एक लड़का खड़ा होय कें कहलकै, “गुरु जी, कोय हमरों पेंसिल चुराय लेने छै ।”

“ई जमात में कोय लड़का चोर नै छै” गुरु जी कहलकै, “तोहीं घरों में पेन्सिल भूली ऐलों होभैं ।”

‘नै गुरुजी’ वैं लड़का फेनू कहलकै, “हम्में लंच रों छुट्टी सें पहिलें आपनों पेन्सिल सें लिखलें छेलियै । कै एक ठो साथियों हमरा पेन्सिल सें लिखतें देखलें छै ।”

गुरुजी जमात के सब लड़का के ध्यान खींचतें कहलकै कि सब्भैं आपनों आपनों बस्ता देखै । सब्भैं आपनों आपनों बस्ता देखलकै, कि शाअत गलती सें पेन्सिल केकरो बस्ता में नै चललों गेलों रहें ।

फौरन सब लड़का गुरुजी के हुक्म के पालन करलकै । सब्भैं

आपनों-आपनों बस्ता देखलकै, मतरकि पेन्सिल तें केकरो जिममा नै छेलै ।

तखनिये कुछ लड़का इकट्ठे खड़ा होय कें कहलकै, “हमरा सिनी तें कलास सें उठी कें निकली गेलों छेलियै, जों बैठलों रही गेलों छेलै तें फैसल । आबें फैसल ही ऊ पेन्सिल के बारे में बतावें पारें ।”

लड़का सिनी कें ई बात सुनी कें गुरुजी फैसल सें पूछलकै,” की है बात सही छेकै कि जबें सब्भे लड़का चललों गेलों छेलै, तबें तोहें आपनों जग्घे पर बैठलों रही गेलों छेलें ?”

“जी गुरुजी ।” फैसल नें कहलकै ।

“तोहें आपनों ई साथी के बस्ता देखलें छेलें ?”

“देखलें छेलियै । पेन्सिलो खुल्ला किताब पर रखलों छेलै ।”  
फैसल नें जबाब देलकै ।

“तें तोहें पेन्सिल नै लेलें छें ?” गुरुजीं पूछलकै ।

“नै गुरुजी, हम्मं पेन्सिल नै लेलें छियै ।” फैसल के जबाब में सच्चाई छेलै ।

गुरुजीं फेनू कुछ नै पूछलकै, केन्हें कि हुनी जानै छेलै कि फैसल चोर न हुएँ पारें ।

शाम कें छुट्टी होलै तें सब लड़का मिली कें वहें पेन्सिल के बात करें लागलै । यहाँ तक कि सब्भें फैसल कें ही चोर कही रहलों छेलै ।

दोसरो दिन फेनू वहें घटना घटलै । लंच के छुट्टी के बाद वहीं रं एक लड़का खड़ा होय कें कहलकै, “गुरुजी, हमरो रबड़ गायब छै ।”

ऊ लड़का फैसल के नगीच बैठै छेलै ।

गुरुजी आरो जमात के सब्भे लड़कां फैसल दिश देखलकै । कुछ तें खड़ा होय कें कहलकै, “अइयो हमरा सिनी बाहर छेलियै, जबें कि फैसल यहीं रही गेलों छेलै ।”

एक लड़कां तें यहाँ तक कही देलकै कि रबड़ बिना शक फैसल नें ही चुरैलें छै ।

ई सुनलें गुरु जी डांटी कें बोललै, “चुप, फैसल कभियो चोर नै हुएँ पारें ।” फेनू हुनी समझाय के लहजा में कहलकै, “बिना देखलें, सोचलें समझलें केकरो चोर नै कहना चाही । फेनू फैसल तें तोरो साथी छेकौ । पढ़ै-लिखै आरो खेलै-कूदें में भी तोरा सें आगू छै । जों गलती सें वें पेन्सिल

लैयो लेतियै तें स्वीकारो करी लेतियै ।”

ऊ दि शाम कें लड़का सिनी मिली कें फैसला करलकै कि आबें वें सिनी फैसल सें बोलचाल बन्द करी देतै ।

अजीब खेल होय रहलौं छेलै । तेसरो दिन एक लड़का रों तस्वीर रंगे वाला ब्रश गायब होय गेलै । आरो यहू दाफी दोसरा लड़का सिनी फैसल कें ही चोर ठहरैलकै । एक लड़का आपनों जग्घा सें उठलै आरो गुरु जी के नगीच जाय कें हुनकों कान में कहलकै, “गुरु जी, अइयो लंच के छुट्टी में फैसल यहीं बैठलौं रही गेलौं छेलै । काहूँ नै गेलै । ब्रश जरूरे एकरों बस्ताहै में होतै । आपनें एकरों बस्ता रों तलाशी ला ।”

गुरु जी फैसल के बस्ता के तलाशी लैलें नै चाहै छेलै । हुनकों दिल कहै छेलै कि फैसल चोर नै हुएँ पारें । तहियो हुनी लड़का सिनी सें कहलकै “तोरा सिनी में जे फैसल कें चोर समझै छैं, ऊ आगू आवें आरो खुद अपने हाथों सें ओकरो बस्ता के तलाशी ले । जो ब्रश निकली गेलै तें फैसल कें एतै छड़ी पड़तै कि दिन्हे में तारा नजर आवें लागतै ।”

मतरकि कोय्यो लड़का आगू नै बढ़लै । गुरु जी फैसल सें कहलकै, “तोहें आपन्हें सें आपनों बस्ता सें सब चीज निकाली कें दिखाय दें, ताकि सब लड़का कें संतोष होय जाय ।”

गुरु जी के कहला मुताबिके फैसल ने आपनों बस्ता के सब्भे टा सामान उलटी देलकै आरो कहलकै, “चोर हम्मं नै छिकां, मतरकि हम्मं चोर के पता लगाय लेलें छियै गुरु जी । आपनें जो एक कुदाल मंगवाय दौ तें हम्मं चोर कें पकड़ी लेवै आरो होलै तें गायब होलौं चीजो सब मिली जाय ।”

गुरु जी के कहला पर एक लड़का माली के घर गेलै आरू कुदाल मांगी कें लै आनलकै । तबें फैसल ने कुदाल हाथों में लै कें कहलकै, “चोर लंच के छुट्टी वक्ती क्लास में सुनाफड़ देखी कें आवी जाय छै आरो डेस्क पर राखलौं हौल्कों, छोटों चीजों कें उठाय लै जाय छै । आजे हम्मं ऊ चोर के पता लगैनें छियै । ऊ क्लास रों पीछू एक बिल में छुपलौं बैठलौं छै ।”

एतना कही फैसल ऊ बिल रों नगीच ऐलै । गुरु जी साथें आरो सब लड़का ओकरो पीछू-पीछू छेलै । फेनू फैसल ने बिल कें खोदना शुरू करलकै आरो ठीक दूए फीट के बादे वैसें एक चोर निकली कें भागलै । कुछ

लड़का तें ऊ भागतें चोर रों पीछू दौड़लै आरो बाकी लड़का सिनी बिल में रखलें ऊ गायब होलें सामान सिनी कें देखें लागलै ।

तबें की छेलै, वहेँ दिनों सें क्लास के लड़का सिनी फैसल कें जासूस कहवों शुरू करी देलकै ।

कॉलेज रों कैम्पस में बड़ी भीड़ छेलै । मोना क्लब आरो आजाद लाइब्रेरी क्रिकेट टीम के बीच आय फायनल मैच के दिन छेलै । दोनों टीम के खिलाड़ी सिनी देश सें बाहर के मैचो में खेली चुकलें छेलै । यही लें हजारो के संख्या में दर्शक कै एक दिनों सें वहाँ मौजूद छेलै । बाउन्ड्री लगहेंँ ऊ सब घुरी-घुरी ताली बजाय के एक टीम रों हौसला बढ़ाबै छेलै । दोसरो टीम खिलाड़ी कें आउट करी दाद हासिल करी रहलें छेलै ।

मैच देखै वाला में नामी जासूस फैसल साथे ओकरो सचिव ब्रेशा, दोनों के दोस्त दानिश, मौन, शिम्मी, गजाला आरो फराज भी मौजूद छेलै । फैसल आपनों सचिव ब्रेशा के साथें आय पहिलें दाफी मैच देखै लें ऐलें छेलै । ऊ भी मोना क्लब केरों अनुरोध पर, कैन्हेंँ कि ऊ ई टीम केरों सह अध्यक्षो छेलै । चूँकि विद्यार्थिये जमाना सें एकरा खेल-कूद में बड़ी दिलस्पी छेलै आरो येंनं कैएक ठो पुरस्कारो जीतलें छेलै, यही लें मोना क्लब नें ओकरा सहायक अध्यक्ष चुनी लेलें छेलै । हालांकि वें टीम वास्तें आय तांय कुछवो नै करलें छेलै । ओकरा फुर्सते नै छेलै । आय बड़ी मुश्किल सें वें दू घण्टा रों समय निकाललें छेलै—आरो मैच देखै लें पहुँची गेलें छेलै ।

मैच देखै वाला में शहर के जानलें मानलें हस्ती साथें, सरकारी अफसर आरो बेशुमार लोगो छेलै । आजाद टीम केरों खिलाड़ी जॉन तेजी सें रन बनाय रहलें छेलै, ओकरा सें लोगों कें विश्वास होय गेलें छेलै कि आधे घण्टा में ई टीम जीत हासिल करी लेतै ।

मतरकि ठीक वही वक्ती मैदान में कैएक ठो धमाका होलै । दोनों तरफों सें दू-तीन खिलाड़ी कें फैसल नें जमीन पर गिरतें देखलकै । लोगों में

एकदम खलबली मची गेलै ।

सब्भे आपनों-आपनों जग्घा सें उठी खड़ा होलै । स्थिति ई छेलै कि चारो दिश शोर मची गेलों छेलै । देखतहैं-देखतहैं मैदान में धुआँ भरी गेलै ।

ठीक हेकरे बाद होने धमाका गेटो पर होलै । वहाँ ठां घन्नों धुआँ करों गुबार फैली गेलै । फेनू कैएक ठो चीखो सुनाय पड़लै आरो एकरे साथ गोलियो चलै के आवाज सुनाय पड़लै ।

फैसल के देहों में जेना बिजली दौड़ी गेलै । वैनें हिन्नें-हुन्नें देखलकै फेनू तेजी सें ऊ धुआँ दिश दौड़ें लागलै । भीड़ के कारण रास्ता बनैवों मुश्किल होय रहलों छेलै । मतरकि ओकरों फुर्ती-चुस्ती आरो प्रत्युत्पन्नमतित्व हेने मौकाहौ पर देखलों जाय छै ।

सिपाही सिनी लोगों कें मैदान सें हटाय के कोशिश करी रहलों छेलै । वैं सिनी फैसल कें भी आगू बढ़ै सें रोकी देलकै । लोगें विकेट लुग घेरा बनाय रखलें छेलै । घेरा में एक आदमी जमीन पर पड़लों होलें छेलै । नै जानों, केन्हों बम फटलें छेलै कि धुआँ हटिये नै रहलें छेलै । साफ-साफ कुछ नजरे नै आवी रहलें छेलै ।

फैसल नें आपनों साथी सिनी सें कहलकै, “तोर सब मैदान के किनारिये रहों । पुलिस के सिपाही तोरा सिनी कें पहचानें नै पावी रहलें छें, यै लेली आगू बढ़ी नै देतों । हम्में जाय कें कोय किसिम सें ई पता करै के कोशिश करै छियै कि आखिर होलें छै की ?”

ई कही फैसल गैलरी दिश मुड़ी गेलै । पुलिस के सिपाही केकरहौ आगू नै जावें दै । संयोगे सें एक सिपाही फैसल कें पहचानी लेलकै । वैं बड़ी अदब सें ओकरा सलाम करलकै आरो आगू बढ़ें देलकै ।

आगू बढ़ला पर एक जगह रुकी कें फैसल नें देखलकै, कही कुछ लोग केकरौ घेरी कें खड़ा छेलै ।

फैसल नें गौर करी कें देखलकै, अधेड़ उम्र के एक आदमी चित्त पड़लें होलें छै । ओकरों दाड़ी आरो माथा के बाल आधों पकी चुकलें छेलै । ओकरों बदन पर कारों रंग के कीमती गरम सूट छेलै । आरो कोट के बटन खुललें होलें छेलै । भीतर के कमीज सफेद छेलै, जेकरों सामना वाला हिस्सा लहू सें लाल होय गेलें छेलै ।

फैसल नें देखलकै कि लहू ओकरों कमीज के भीतर सें बही रहलें

छेलै आरो यहू कि ढेरे लहू जमीन पर फैली चुकलौं छेलै ।

फैसल के दोनों आँख सोचै के अन्दाजा में सिकुड़ी गेलै । अभी ऊ दुर्घटना के भीतर तांय जावो नै पारलें छेलै कि ओकरो नजर एक ठो भारी भरकम आदमी पर पड़लै । ऊ इन्सपेक्टर हबीब छेलै, जे लम्बा लम्बा साँस लै रहलौं छेलै । चार-पाँच सिपाही ओकरो पीछू-पीछू छेलै । इन्सपेक्टर के नजर फैसल पर पड़लै तें भीड़ के हटैतें ऊ फैसल लुग पहुँची गेलै ।

“आपनें यहीं छौ । खुदा के शुक्र छै । मतरकि है सब होलै केना ?”

“हत्या” फैसल नें गंभीरता सें कहलकै, “आरो कोय शक नै कि हत्यारा बड़ा जबरदस्त निशानेबाज छै । हम्मू हैरान छी एक्के ठियां तीन गोली रों निशाना कोय आसान काम नै छेकै ।”

“आपनें के ई बारे में की ख्याल छौं ?” इन्सपेक्टर हबीब नें पूछलकै ।

“जहाँ तक हममें समझै छियै ई हत्या गोली सें नै होलौं छै ।”

इन्सपेक्टर चकराय के रही गेलै । वैं पूछलकै, “तें की, यैं आत्महत्या करी लेलकै ? गोली नै लागलै ? खून केना होलै ?”

“हमरो साथ आवो” फैसल नें कहलकै, “आरो आपनों सिपाही सिनी सें कही दौ कि केकरौ गैलरी सें बाहर नै जावै दै । हममें लहाश के जरा अच्छा किसिम सें देखी लै छियै, तभिये कोय बात पूरा विश्वास रों साथें कहें सकवौं ।

फैसल ऊ जख्मी उधेड़ के नगीच पहुँची के थोड़ों नीचें दिश झुकलै । वैंने पहिलें जख्मी के चेहरा देखलकै, फेनू ओकरो हाथ उठाय के गौर सें देखें लागलै । कोटों के आस्तिनो वैं ऊपर चढ़लें छेलै ।

तखनिये एक सिपाही वैठां हाफतें होलौं पहुँचलै आरो इन्सपेक्टर सें कहलकै, “हुजूर एक ठो आरो लहाश.....मैदान रों पूर्वी गेट पर....ओकरो माथा सें खून बही रहलौं छै ।”

इन्सपेक्टर जेना एकदम सें बौखलाय उठलै ।

लहाश सें आपनों नजर हटैतें फैसल नें इन्सपेक्टर सें कहलकै, “यैठां आपनें आपनों दू-तीन सिपाही पहरा पर लगवाय दौ, फेनू लोगों सें ई पूछताछ करों कि जबें धुआँ के बम फुटलौं छेलै, तबें कोय की कातिल के

देखलें छेलै ? जे लोग यैठां मौजूद छै, ओकरो सिनी सें पता लगैलें जाय कि ओकरो लुग के-के बैठलें छेलै आरो के ओकरो गैलरी सें गायब होय चुकलें छै ? कोय्यो आदमी के लहाश के नगीच आवै लें नै देलें जाय । हम्मं कोय निर्णय पर पहुँचै के कोशिश करी रहलें छियै ।”

इन्सपेक्टर फैसल रॉ सुझाव पर सिपाही के ड्यूटी पर लगाय देलकै ।

आरो जे सिपाही अभी-अभी खबर देनं छेलै, ऊ बोललै, “हुजूर, हेड कॉन्स्टेबुल सगीर खान तोरा मैदान में बुलाय रहलें छीं । एक लड़का घुरी-फिरी लहाश सें लिपटी के कानी रहलें छै, चिल्लाय रहलें छै ।”

इन्सपेक्टरें फैसल दिश देखलकै, फेनू सिपाही साथें आगू बढ़लै । तखनी तांय दानिशो वैठां पहुँची गेलै ।

“तोहें गेट दिश खड़ा छेलौ, वहाँ की देखलौ” फैसल नें पहिलें सवाल यहें कहरलकै ।

“हम्मं तें कुछ नै देखलियै । होना के ई अनुमान छै कि जबें हत्यारा भागी रहलें होतै, तबें चौकीदारें ओकरा भागै सें रोकलें छेलै आरो ऊ स्थिति में हत्यारां कोय डण्डा सें ओकरा पर प्रहार करी देलें होतै, जेकरे कारण चौकीदार बेहोश होय गेलै । एक बच्चा गेट सें बाहर जाय रहलें छेलै कि ओकरो नजर चौकीदार पर पड़लै.....चौकीदार जमीन पर चित्त पड़लें छेलै । बच्चा घबराय गेलै आरो शोर मचाबें लागलै—खून, खून, खून..... । हौ चीख सुनी के हम्मं गेट दिश भागलियै । चौकीदार के दिल रॉ धड़कन देखलियै । ऊ मरलें नै छेलै । आकरो माथों सें खून बहतें देखी के बच्चा चीखें लागलें छेलै ।”

“गजाला, ब्रेशा आरो फराज कहाँ छै ?”

“पुलिसें हुनका सिनी के हिन्नं नै आवें देलकै” दानिश नें कहलकै, “तोरों की ख्याल छीं—हत्यारा के हुएँ पारें ?”

“अभी की कहलें जावें पारें” फैसल नें कहलकै, “स्थिती देखी के हम्मं तें यही नतीजा निकालें सकलें छियै कि हत्यारा एक नै, दू होतै । खैर, हमरों साथ आवों ।”

दानिश ओकरो पीछू-पीछू चलें लागलै । पुलिस वाला गैलरी में मौजूद लोग सिनी के एक दिश धकेलवो करी रहलें छेलै । वै सिनी हत्यारा



के बारे में पूछताछ शुरू करी देलें छेलै ।

जैठां लहाश पड़लौं छै, फैसल वैठां पहुँची रुकी गेलै । वै बच्चा रौं आवाज सुनलकै । ऊ कपसी-कपसी कही रहलौं छेलै, “अफजल भाय तोहें अकेल्ले कैन्हें चल्लौं गेला, हमरौ साथ लै चलौं ।”

इन्सपेक्टर ऊ लड़का कें पकड़लें लहाश से दूर लें जाय रहलौं छेलै ।

दोनों टीम के खिलाड़ी सिनी उदास आरो परेशान छेलै । हुन्नें सबके चेहरा पर दुःख उपटलौं होलौं छेलै । पुलिस फोटोग्राफर लहाश के तस्वीर उतारै में छेलै । इन्सपेक्टर सहित ऊ सब लहाश के आसपास आँख गड़लें होलें छेलै कि कहीं गोड़ो के निशान मिली जाय ।

लड़का कें एक कुर्सी पर बिठाय कें इन्सपेक्टर फेनू सें फैसल के नगीच आवी गेलै आरो कहलकै, “लहाश देखी ला ।”

दोनों आगू बढ़लै । दानिश पीछुए रही गेलै ।

अफजल रौं कमीज लहू सें लाल होय चललौं छेलै । फैसल ने लहाश के आस्तीन ऊपर चढ़ैलकै आरो उठी कें खाड़ौं होय गेलै । एक क्षण लेली चुप्पी साधते ऊ बोली पड़लै, “इन्सपेक्टर साहब, मामला बड़ी आश्चर्यजनक आरो रहस्यपूर्ण छै । है कोय मामूली हत्या रौं केस नै छेकै । हम्मैं अम्पायर से बात करै लें चाहबै ।”

इन्सपेक्टर नें ओकरा खिलाड़ी सिनी के बीच आनलकै । वहाँ सब्हे आपनों साथी बॉलर अफजल रौं मौत पर मुरझैलौं छेलै । खिलाड़ी सिनी सें हटी कें फैसल अम्पायर के सामना आवी कें ओकरो सें पूछलकै “हम्मैं तोरा सें कुछ सवाल पूछै लें चाहै छियौं आरो सब में पहिलें तौहे ई बतावौं कि बम कौनें फेंकलें छेलै ?

“जखनी बम फेकलौं गेलै, तखनी तें हमरौ ध्यान कट के दिश छेलै । यही सें हम्मैं कुछ नै देखें पारलियै ।”

“कोय खास बात तोरौं बुझैलौं छेलै ?”

“हौं, एक खास जरूर बुझैलौं छेलै, मतरकि ओकरो जिक्र शायत मुनासिव नै होतै ।”

“ओकरा तोहें जरूर कहौं, हुँ सकें छै कि तोरौं नजर में जे बेमानी छै, हमरा ओकरहै सें कोय रास्तौ तें मिलें सकें छै ।”

फैसल के बात सुनी के अम्पायरें कहना शुरू करलकै, “बम फटला के बाद जबे धुआँ फैलें लागलै, तखनी नीचला उड़ान लेतें एक गिद्ध के हम्मं आपनों ओर ऐतें देखलें छेलियै । हम्मं नै कहें पारों कि ऊ मैदान में केना ऐलों छेलै । देखतहें देखतहें धुआँ घन्नो होय गेलों छेलै आरो ऊ ओकरा में गुम होय गेलै । ठीक वही वक्ती गोलियो चलै के आवाज सुनाय पड़लै । फेनू केकरो चीख उभरलों छेलै । तबे हम्मं अफजल के लड़खड़ाय के गिरतें देखलें छेलियै । हम्मं घबराय के जेन्है आगू बढ़लियै तें हम्मू गिरी पड़लौं ।”

ई सुनी के फैसल रों आँख सोच में डूबी गेलै ।

“की सोची रहलौं छों ?” कुछ देरी के बाद इन्सपेक्टरें पूछलकै ।

“हम्मं समझै छियै कि अफजल रों मौत गोली लगला सें नै होलों छै ।”

इन्सपेक्टर साथें आरो खड़ा खिलाड़ियो चौकी के फैसल दिश देखें लागलै ।

“ई तोहें की कही रहलौं छों ?” इन्सपेक्टरें हैरान होतें कहलकै ।

“हम्मं कोय गलत बात नै कही रहलौं छियै । धुआँ आरो गिद्ध रों बारे में तोहें सुनी चुकलौं छौ । ओकरो पीछू गहरा राज छै ।”

“मतरकि गोली चलै के आवाज तें कैएक लोगें आपनों कानों सें सुनलें छै ।” अम्पायरें कहलकै तें फैसल मुस्कराय पड़लै । कहलकै, “है गोली सिनी हमरा धोखौ दै वास्तें तें चलैलों जावें सकै छें । गिद्ध संयोगेवश नै आवें पारें । ओकरा जानी-बूझी के भी तें भेजलौं जावें सकै छें ।”

“आखिर कौनें भेजलें होतै ?”

“बतावै छियौं” फैसल घुमी के इन्सपेक्टर दिश होलै, “पहिलें हमरों साथ आवों । ई लड़का सें बात करी देख छियै, जे अभियो तांय कानी रहलौं छै ।”

दानिशो हुनका सिनी के साथें लड़का लुग गेलै । कुछ लोग ऊ लड़का के घेरी खड़ा छेलै । फैसल लड़का के सामना होतें पूछलकै, “तोरो नाम की छेकौं बाबू ?”

“राशिद ।”

अफजल आरो तोहें, दोनो भाय छेकें ?”

“नै ।”

“हमरा तोरों दुःख के अन्दाजा छै, मतरकि आबें जरूरत हत्यारा कें पकड़ै के छै । तोरा चाही कि तोहें हमरों साथ दें ।”

“हम्में केना साथ दिऐं पारों । हम्में आबें घोर जाय लें चाहै छी ।”

लड़का फेनू कानें लागलै । इन्सपेक्टरें ओकरो कंधा थपथपैतें कहलकै, “घबड़ावों नै, हम्में तोरों घोर में खबर भिजवाय देलें छियों । आबें तोहें चुप होय जा ।”

ओकरो चुप होथें फैसल नें पूछलकै, “तोरों नजर शुरुवे सें आपनों भाय पर लागलौं हातों । आबें ई बतावों कि जखनी घटना घटलै, तखनी तोहें की देखलौ ?”

“हम्में धुआँ उठतें देखलियै । चलतें हुऐं गोली सिनी के आवाज सुनलियै । भाय जान कें गिरतें होतें देखलियै, तबें हम्में दौड़ी पड़लौं छेलियै ।”

“कहीं तोहें धुआँ में आरो कछ देखलें छेलौं ?”

राशिद कुछ देरे लेली सोचतें रहलौं छेलै, फेनू कुछ संकोच सें बोललै, “हों जेन्है धुआँ उठलै, हम्में एक गिद्ध उड़तें हुऐं देखलियै । मतरकि गिद्ध के उड़लौं सें की होय छै । हमरा जावें दें, हम्में घोर जैवों ।”

“ठीक छै, घोर जा ।” फैसल नें ओकरा घोर जाय के इजाजत दै देलकै ।

लड़का के उठतैं इन्सपेक्टरें कहलकै, “आपनों घर के पता, टेलीफोन नम्बर आरो जे कछ भी ई लहाश के बारे में पता छौं, सब लिखलें जा ।”

“कमाल करै छौं !” फैसल नें कहलकै, “अफजल कें नै जानै छौं ?”

“एकदम नै, हमरा क्रिकेट सें कोय दिलचस्पी नै छै । हों फुटबॉल आरो टेनिस के खिलाड़ी सिनी कें जरूरे जानै छियै ।”

“होना कें अफजल के बाबू मुहम्मद अकबर नामी खिलाड़ी छेलै, हुनको नाम तें सुनले होवौ ।”

“ओहो” इन्सपेक्टरें अफसोस करतें बोललै, “अकबर कें के नै जानै छै । हुनी तें कैप्टनो रही चुकलौं छेलै । तें ई अफजल आरो राशिद हुनके बेटा छकै ।

“जा रशीद जा, जों हमरों कोय्यो जरूरत पड़ौं तें, हमरा याद

करियों ।” फैसल नें कार्ड में छपलौ आपनों नाम आरो पता राशिद कें थमैंतें कहलें छेलै । ई कार्ड ब्रेशा के कहला पर छपवैलौ गेलौ छेलै ।

ठीक वही वक्ती ब्रेशा साथें गजालौ आवी गेलै । फैसल नें ऊ दोनों आरो दानिश कें अंगुरी रौ इशारा करलकै । सब ओकरो इशारा समझी गेलै कि राशिद रौ पीछा करना छै । होना कें ब्रेशा आरो गजाला ऊ लड़का के नामो तक नै जानै छेलै आरो नै तें मालूम छेलै कि मृतक अफजल सें ओकरो की रिश्ता छेकै । जबें ऊ सिनी मैदान सें बाहर निकली ऐलै, तबें दानिश नें ऊ दोनों कें जल्दी सें सब जानकारी दै देलकै ।

फैसल नें इन्सपेक्टर सें कहलकै, “आबों, आबों ! दुसरो लहाश हमरा सिनी देखी लिए” आरो चलतैं-चलतैं वै कहलकै, “आबें हमरा विश्वास होय गेलौ छै कि हत्यारा एक नै, बल्कि दू छेलै ।”

“ई तोहें केना कहें सकै छौ ?” इन्सपेक्टरें पूछलकै ।

“ई बात ई आधार पर कही रहलौ छी कि एक्के वक्ती में दू हत्या होलै । दोनों हत्या अलग-अलग जग्घा में होलै आरो दोनों जग्घों के बीच काफी फासला छै । कोय्यो हत्यारा एक जग्घा में खून करला रौ बाद पलक मारतैं दोसरा जग्घा पर नै पहुँचें पारें । हत्या एक्के वक्ती में होलै आरो दू आदमी मारलौ गेलै ।”

ई दलील कें इन्सपेक्टर मानै वास्तें मजबूर छेलै ।

जे लोग मैच देखै लें ऐलौ छेलै, ऊ सिनी अफसोस करी रहलौ छेलै कि एतें जबरदस्त मैच अधूरे रही गेलै । नै केकरो हार होलै, नै केकरो जीत । आबें लोग मैदान सें आहिस्ता-आहिस्ता जाबें लागलौ छेलै ।

फैसल आरो इन्सपेक्टर ऊ जग्घा में पहुँची गेलौ छेलै, जैठां एक अधेड़ के लहाश पड़लौ होलौ छेलै । कुछ सिपाही लहाश के निगरानी करी रहलौ छेलै ।

फैसल झुकी कें अधेड़ के लहाश देखें लागलै । ओकरो भोंवां अजीबे किसिम के लागलै । लहाश के आँखी पर मोटों शीशा केरों चश्मा छेलै । बदन पर कोट छेलै ।

वैनें लहाश के तोंद पर हाथ रखले छेलै कि हठाते ऊ चौंकी पड़लै चौंके के साथे ओकरो ठोरों पर हल्का रं मुस्कानो फैली गेलै । वैनें कमीज रौ आस्तीन हटाय कें ओकरो बाँही फेनू एक दाफी देखलकै आरो हाथ झाड़ी

कें उठी गेलै । इन्सपेक्टर दिश देखतें हुएँ वैं कहलकै, “ई कोय बूढ़ा आकि अधेड़ आदमी के लहाश नै छेकै ।”

आसपास रों खड़ा लोग सब ई बात पर हैरान होय कें रही गेलै । ऊ सब कभियो लहाश कें देखै, कभियो फैसल दिश देखें लागै । परेशान होय रहलौ इन्सपेक्टर बोली पड़लै, “हमरों समझ में कुछुवो नै आवी रहलौ छै ।”

“अभी समझाय दै छियौं इन्सपेक्टर साहब, मजकि ठहरो । पहिलें फोटोग्राफर कें आपनों काम तें करी लैलें दौ । आरो ई बहुत जरूरियो छै ।”

कुछ देर बाद फैसल नें फोटोग्राफर कें रुकै के इशारा करतें कहलकै, “आवें एक दूसरों आदमी के फोटू लै वास्तें तैयार रहें ।” आरो एतना कहतें वैं हाथ बढ़ाय कें लहाश रों भौआं उखाड़ी देलकै ।

लोग सिनी ताज्जुब सें देखलकै कि ओकरो भौआं के पीछू कारों भौआं मौजूद छै । फैसल नें फेनू हाथ बढ़ाय कें ओकरो छोटों आरो खूबसूरत दाढ़ी खींची लेलकै । चेहरा पर आबें कोय दाढ़ी नै छेलै । दाढ़ी के नीचू साफ चेहरा नजर आवी रहलौ छेलै ।

“अरे ई तें कोय युवक छेकै ।” इन्सपेक्टर बड़बड़ैलै ।

फैसल नें पहिलें लहाश रों कोट के बटन खोललकै । फेनू कमीज रों बटन खोली देलकै । लोग सिनी बड़ी दिलचस्पी आरो हैरत सें ई सब देखी रहलौ छेलै । ऊ सिनी वास्तें ई जादुई दृश्य सें कम नै छेलै । फैसल नें लहाश के पैंट सें कमीज खींची कें बाहर करलकै । फेनू आपनों हाथ ओकरो पैंट के दिश सें कमीज में डाली देलकै । आरो जबें बाहर करलकै तें हाथों में रुय्या के मोटों रं पैड छेलै ।

रुय्या के पैड दिखैतें फैसल नें कहलकै, “ई रहलै ऊ अधेड़ आदमी रों नकली तोंद ।”

“कमाल होय गेलै । एकरो तोंदो नकली छेलै ।” लोग सब बोली उठलै ।

तखनी इन्सपेक्टरें फैसल के प्रति श्रद्धाभाव व्यक्त करतें कहलकै, “तोहें तें सचमुचे में कमाल करी देलौ । सैंकड़ो लोगें लहाश देखलें होतै, मतर तोरों सिवा कोय नै समझें सकलै कि एकरों सच्चाई की छेकै । एक बात समझें में नै ऐलै कि एकरा मरनै छेलै तें भेस बदली कें कैन्हें मरलै ।

फेनू यही ठां मरना की जरूरी छेलै । कोय दुसरो जग्घो जाय के केन्हें नी मरलै ?”

आस-पास रों लोग हठाते खिलखिलाय के हँसी पड़लै । आपनों बात पर हँसतें देखी के इन्सपेक्टर आपन्हौ हाँसी पड़लै ।

फैसल ने मुस्करैतें कहलकै, “ई तें मालूम करै लें पड़तै कि आखिर ई यहीं आवी के केन्हें मरलै आरो फेनू हुलिया बदली के केन्हें मरलै ?” ई कहला साथें वै लहाश के बाँही देखे लागलै । बाँही पर तीन सुराख छेलै । हर सुराख के किनारी पर सें चमड़ी कुछ उधड़ी गेलों छेलै । तीनों सुरागा में सें बीच के सुराख कुछ ज्यादा गहरा छेलै । मतरकि तीन सुराख एक्के सीध में नै छेलै । कुछ टेढ़ों छेलै या कुछ तिरछों कही ला ।

फैसल उठी खाड़ों होलै । वै इन्सपेक्टर सें कहलकै, “आवों, जरा आबें फेनू सें अफजल केरों लहाश देखलें जाय । एकरे बाद पता चली जैतै कि अधेड़ के हुलिया में ई नौजवान के हत्या केना होलै । साथे-साथ अफजलो केरों खून केना होलै ।”

ऊ दोनों फेनू मैदान में जाय पहुँचलै । कुछ लोगें हुनका सिनी के साथे साथ ऐलों छेलै । फैसल एक दाफी फेनू ऊ लहाश पर झुकलै । आश्चर्य कि ओकरो गर्दन पर होने तीन सुराख छेलै, जेहनों कि अधेड़ बनलों नौजवान के बाँही पर छेलै ।

फैसल ने इन्सपेक्टर सें पूछलकै, “की तोहें बतावें पारै छौ कि मारलों गेलों ई आदमी के गर्दन पर ई तीन सुराख केना छै ?”

“गोली के सुराख छेकै आरो की ?”

“इन्सपेक्टर साहब, तहूँ बस कछुवा के खाले भर देखे छौ, है नै देखे छौ कि कछुवां आपनों गर्दन खाल में कहाँ छुपाय रखलें छै । ई निशान आकि सुराख गोली के नै छेकै ।” फैसल ने मुस्करैतें कहलकै ।

इन्सपेक्टरें बगल झाँकतें कहलकै, “तें फेनू ई सुराख कोन चीजों के छेकै ?”

“मौत रों पंजा केरों निशान छेकै ।” फैसल बोललै ।

“मौत रों पंजा के निशान !” इन्सपेक्टर हैरान रही गेलै ।

“जी हों, एकरा मौत रों पंजे कहें पारों ।”

“की मतलब ?”

“मतलब कि दोनों आदमी रों मौत के कारण छेलै—मौत रों पंजा । अच्छा ई बतावों कि जे लोग गैलरी में मौजूद छेलै, ऊ सबसें पूछताछ के दायित्व केकरौ पर छेलै ? अधेड़ बनलों ई नौजवान रों जबें खून होलै तें कोय्यों आँखी देखलों गवाही देलें छै ?”

“हम्में खुद्दे वैठां मौजूद छेलियै ।” एक आदमी आगू बढ़ी कें कहलकै ।

“तोरों नाम ?” फैसल नें पूछलकै ।

“हमरा मुशरफ इमाम कहै छै आरो जमालुद्दीन चक रों मॉडल कॉलोनी में रहै छी ।”

“हों तें, तोहें की देखलौ ?”

“जबें धुआँ छँटलै तें, हम्में वैठां एक ठो आदमी कें देखलियै । ओकरो दाढ़ी कारों-कारों छेलै । ओकरो आँखी पर कारों चश्मा छेलै । वै नीला रंग के लम्बा कोट पहिनी राखलें छेलै । फुलपेंट गोड़ों सें सटलों-सटलों छेलै । कोट के नीचें वै ऊनी कमीज पिन्ही राखलें छेलै, जे बादामी रंग के छेलै । गल्ला में फूलदार टाई बांधलों होलों छेलै । मजकि एक खास बात यहू छेलै कि ओकरो एक हाथ गायब छेलै । कोट रों एक आस्तीन झुली रहलों छेलै ।”

“आरो ?” कहतें-कहतें फैसल सोच में डूबी गेलै । कुछ पलों के बाद वै इन्सपेक्टर सें कहलकै, “आबें हम्में चलै छियों । तोहें लहाश आरनी उठवावों । होना कें तोरा चार बातों पर ध्यान रखना छों । ऊ नौजवान कें बुलाय कें ई अधेड़ के लहाश के पहचान करवाना छों । ऊ लम्बा कोटवाला आदमी के तलाशी करवाना छों । अफजल के जिनगी के स्थिति- परिस्थिति के बारे में जानकारी लै कें कोशिश करों आरो जतना जल्दी हुएँ, हमरा रिपोर्ट दै के कोशिश करों ।”

“जी बहुत अच्छा ।” इन्सपेक्टरें मुस्तैदी सें कहलकै ।

ब्रेशा, गजाला आरो दानिश बड़ी देर से राशिद से पीछा करी रहलें छेलै । राशिद पैदले चली रहलें छेलै । चलते-चलते ऊ डाकबंगला से नगीच पहुँची गेलै । ब्रेशां दानिश के केहुनी मारते कहलकै, “दानिश, ऊ ते एक सीध में ही आगू बढ़लें जाय छै, जेना अपना आप में ही नै रहें ।”

“हों, ई बात ते छै ।”

“मतरकि ओकरा से ज्यादा बेखबर आरो असावधान तोरा दोनो छै ।” गजाला बोललै ।

“केना ?” दोनो हठाते चौकी पड़लै ।

“तोरा दोनो आगू-पीछू देखौ ते पतौ रहौ । हुन्ने बायां दिश दुकान के नगीच देखौ । ऊ लखनऊ मिठाय भण्डार से खम्भा के पीछू । एक आदमी मैदाने से पीछा करते यहाँ तक ऐलें छै आरो लगातार हमरा सिनी साथे राशिद के देखलें आवी रहलें छै ।” गजालां बतैलकै ।

“अरे, ते तहूँ जासूस होय गेलें छें ।” दानिश ने आश्चर्य प्रकट करलकै ।

“आखिर सहेली केकरो छेकियै । ब्रेशा से प्यार के कुछ ते असर होन्है चाहियो ।”

“आरो नै ते की” ब्रेशां कहलकै, “दानिशे से पूछें । ई एक नम्बर के डरपोक छेलै आरो आपनो गोल्डी से ई कदर डरे छेलै कि छी: । ऊ ते जबे दू एक केस में शामिल होलै आरो हमरो करीब ऐलें छै ते, अपना में कुछ हिम्मत पैदा के कोशिश करी रहलें छै ।”

“ई गोल्डी के की खिस्सा छेकै ?” गजालां चमकते आँख से पूछलकै ।

“कुछुयो नै, ब्रेशा ते उटपटांग हाँकते रहै छै ।”

“हमें गलत नै बोलै छियै । आबे देखौ, हमरो नगीच रहियो के अपना में जासूसी से शुध-बुध पैदा नै करे सकलें छै । मजकि गजाला, आय ते तोहें कमाल करी देलौ । जिम्मेदारी से खयाल रखते पीछा करते रहलें छै ।”

“मजकि जिम्मेदारी के ज्ञान तोरो ते नै छें ।” दानिश जली के बोललै ।



“हों, हमरौ सें गलती होय गेलों छै । कभी-कभी होय जाय छै । हों, तें गजाला, तोहें ऊ आदमी के हुलिया देखलें छौ । ऊ अभी सब्भे के आड़ों में छै । जल्दी सें ओकरो हुलिया बयान करी लें—ओकरो दाढ़ी कारों छै, आँखों पर कारों चश्मा छै । बदन पर नीला रंग के लम्बा कोट छै । फुलपैट तंग आरो भूरा रंग के छै । कमीज बादामी रंग के छै, गल्ला में फूलदार टाई बंधलों छै आरो ओकरो दायां दिश के हाथ के आस्तीन झूली रहलें छै । शायत दायां हाथ कटलें रहें ।”

“तोहें तें बड़ी पैनों आँखी सें ओकरो जायजा लेनें छौ । धन्यवाद गजला । आबें तोरा होशियार रहना छौं आरो ई जाहिर नै होना देना छौं कि हमरा सिनी राशिद के पीछा करी रहलें छियै । अच्छा तें यही होतै कि हमरा सिनी आबें राशिद के पीछा छोड़ी कें ऊ आदमी के पीछा करौं ।” दानिश बड़बड़ैलै ।

“नै, नै, हम्में ई सुझाव नै दिऐं पारौं, हमरा आपनों कर्तव्य के पालन करतें रहना छै ।” ब्रेशा के ई राय दोनों कें अच्छा लागलै ।

मतरकि एक जग्धों रुकी कें वै सिनी राशिद दिश सें आपनों ध्यान हटाय लेलकै । होना कें है दिखावे भर लेली छेलै, नै तें तीनों ई देखिये रहलें छेलै कि आखिर राशिद कन्नें जाय रहलें छै ।

दानिश ऊ दोनों सें हटी कें ग्रैण्ड हॉटल के नगीच जाय कें खाड़ों होय गेलै । तखनिये राशिद नें एक ऑटो टेम्पो रुकवैलकै । ड्रायवर सें कुछ कहलकै आरो ऊ वैमें सवार होय गेलै ।

राशिद कें सवार होहें ऊ आदमी सामना में आवी गेलै आरो तेजी सें चलें लागलै आरो देखतहें, देखतहें वहू एक टेम्पो पर सवार होय गेलै । ई देखी दानिशो एक टेम्पो रुकवैलकै आरो ड्रायवर सें कहलकै, “ऊ आगू वाला दोनों टेम्पो रों पीछा करना छै । हम्में पुलिस के आदमी छेकियै ।” ई कहतें ऊ ड्रायवर के बगल में बैठी रहलै ।

टेम्पो के स्टार्ट हुऐं सें पहिलें ब्रेशा आरो गजाला पिछुलका सीटों पर बैठी चुकलें छेलै । ड्रायवरें मुड़ी कें ऊ दोनों के दिश देखलकै । फेनू दानिश दिश देखी कें कुछ कहिये लें चाहै छेलै कि दानिश नें ओकरा टेम्पो स्टार्ट करै लें कहलकै ।

सबसें आगू राशिद के टेम्पो छेलै, ओकरा पीछू कोटवाला आदमी के

आरो ऊ दोनों रों पीछू कुछ दूरी सें जासूस सिनी के टेम्पो दौड़ी रहलौं छेलै । राशिद केरौं टेम्पो टूरिस्ट सेन्टर एम्प्लायमेण्ट एक्सचेंज आरो एम. एल. ए. फ्लैट्स सें आगू निकली के अनीसाबाद कॉलोनी दिश मुड़ी गेलै । कि एकाएक ब्रेशां दानिश रों कन्धा हिलैलकै ।

“की बात छेकै ?” वैं पीछू मुड़ी के पूछलकै ।

“बीच वाला टेम्पो तेज होय गेलौं छै ।” ब्रेशां बतैलकै ।

“हों, ऊ आपनों टेम्पो राशिद केरौं टेम्पो सें आगू निकाली लै चाहै छै ।”

“मतरकि हेनों चाहै छै कैन्हें ?” गजालां पूछलकै ।

“रास्ता सुनसान छै । आस-पास आबादियो कम छै । ओकरों नीयत खराब मालूम होय छै । आखिर वैं पीछा कैन्हें करी रहलौं छै ।”

“हों, मामला खतरनाक बुझावै छै ।” गजालां कहलकै ।

“की तोहें डरी रहलौं छों ?” ब्रेशां पूछलकै ।

“नै, डरबों कथी लें । गजालां एक लम्बा साँस लेतें कहलकै ।

“बस तें फेनू इत्मीनान सें बैठौं । जे कुछ होना होतै, होय के रहतै ।”

“की कोय लफड़ा छै की ?” ड्रायवरें मुड़ी के वैं सबसें पूछलकै ।

“नै नै, हेनों कोय बात नै छै, मजकि देखों, आगू की होय छै ।”

तीनों के नजर सामनें दिश लागलौं होलौं छेलै ।

सड़क रों ई हिस्सा वीरान छेलै । अभी तांय रात नै होलौं छेलै, मतरकि सूरज आँख सें जरूरे ओझल होय चुकलौं छेलै । साथे-साथ बिजली रों बत्ती सिनी भी जगमगावें लागलौं छेलै ।

कि तीनों देखलकै—कोटवाला आदमी रों टेम्पो राशिद के टेम्पो सें आगू निकली गेलौं छै आरो आगू निकलतहैं वैं आपनों टेम्पो के तिरछों करी के रुकवाय देलकै । एकरा सें राशिद के टेम्पोओ रुकी गेलै । एतना होला पर ऊ आदमी टेम्पो सें उतरलै आरो राशिद के कलाई पकड़ी के एक झटका में टेम्पो सें बाहर खींची लेलकै । राशिद चीखें लागलै, मतरकि ऊ आदमी ओकरा जबरदस्ती आपनों टेम्पो में घुसावें लागलै ।

दानिश रों खून खौली गेलै । वैं आपनों टेम्पो के ड्रायवर सें कहलकै, “आपनों गाड़ी ऊ आदमी के गाड़ी नगीच जाय के रोकौं ।”

ऊ आदमी के पास में तेज धार वाला लम्बा चाकू छेलै, जेकरे कारण अगला दोनों गाड़ी के ड्रायवर सहमलों होलों छेलै ।

गाड़ी के रुकतहैं दानिशें आपनों जूता सें ऊ आदमी के चाकूवाला हाथों पर किक लगाय देलकै । ये में दानिश एत्तें फुर्ती दिखैलें छेलै कि ऊ आदमी कें चाकू चलावै के मौकाहै नै मिललें छेलै । दर्द से ऊ आदमी के मुँहों सें कराह निकली ऐलों छेलै । राशिद के हाथ छोड़ी कें ऊ जल्दी सें आपनों टैम्पो में बैठी गेलै आरो जल्दिये सें चाकू ड्रायवर के गर्दन पर रखतें कहलकै, “गाड़ी उड़ाय लै चल, नै तें..... ।”

ड्रायवरें ऊ आदमी के हुकुम मानै में आपनों जान के खैर बुझैलकै, से टैम्पो भगाय कें चलतें बनलै ।

हाथ छुटतहैं, राशिद दानिश सें लिपटी कें कानें लागलै, नै तें दानिश एत्तें आसानी सें भागें नै देतियै ।

“तोरा कोय चोट तें नै ऐलों ?” ब्रेशां पूछलकै ।

“नै, तोरा सब के धन्यवाद, मतरकि ऊ आदमी हमरा जबरदस्ती कैन्हें लै जाय लें चाहै छेलै ।”

“हमरा मालूम नै ।” ब्रेशा बोललै, “संयोगे सें हमरा सिनी हिन्नें सें गुजरी रहलें छेलियै, वरना ऊ तोरा उठाय लै जाय में एकदम सफल होय जैतियों ।”

“हम्में घोर जाय लें चाहै छियै । अभी कुछ देर पहिलें यूनिवर्सिटी कैम्पस में हमरों भाय जान के कोय्यों खून करी देलें छै ।”

“तोरो घोर कहाँ छों, हम्में पहुँचाय देवों ।”

“यही कॉलोनी में छै । थोड़ों आगू, क्वार्टर नं. 4/8”

“चलों आपनों टैम्पो पर बैठों । हमरा सिनी तोरो पीछू-पीछू चलै छियों ।”

आरो एकरों बाद दोनों गाड़ी आगू-पीछू दौड़ें लागलै । सड़क नं. 8 के क्वार्टर नं. 4 के सामना जबें टैम्पो रुकलै तें दानिशें आपनों टैम्पो घुरवाय लेलकै । राशिद कुछ कहै लें चाहै छेलै, मजकि एकरों मौकाहै नै मिलें पारलै ।

“वाह, तोरा सिनी दुनिया के रक्षा करै वाला पुलिस छेकौ ।” ड्रायवर खुश होतें बोललै ।

“ठिकके कहलौ । कभियो-कभियो जबें इन्सानियत आवाज दे छै तें यहू सब करैलें पड़े छै ।” दानिशें जवाब देलकै ।

“अच्छा-अच्छा” ड्रायवरें कुछ नहियो समझतें गर्दन हिलैतें कहलकै ।

घर पहुँचला के बाद वै सिनी फैसल सें मिलै के कोशिश करलकै मतरकि ऊ तखनी आपनों निजी पुस्तकालय में छेलै, जैठां केकरौ जाय के इजाजत नै छेलै । जबें ओकरा पुस्तकालय सें बुलाना रहै, तबें स्वीच बोर्ड के एक स्वीच कें ऑन करी दैलें लागै छेलै । ब्रेशा स्वीच ऑन करी कें ड्रायंग रूम में जाय बैठलै ।

कुछुवे देर बाद फैसल ड्रायंग रूम में आवी उपस्थित होलै । पूछला पर तीनों राशिद के पीछा सें लैकें सबटा कहानी सुनावें लागलै । फैसल खामोश होय चुपचाप सुनतें रहलै । आखरी में वै पूछलकै, “जे टैम्पो पर ऊ भागलौ छेलै, ओकरों नम्बर कोय्यो नोट करलें छौं की नै ?”

सुनतैं तीनों के मुँह खुल्ला के खुल्ला रही गेलै ।

“आरो जे टैम्पो पर तोरा तीनों सवार होलौ छेलै, ओकरों नम्बर ?”

आबें तीनों के नजर एकदम नीचू होय गेलौ छेलै ।

फैसल नें कहलकै, “खैर, आइन्दा खयाल राखियौ कि ई छोटों-छोटों बातो बड़ी मददगार होय छै । ऊ आदमी मैदानो में देखलौ गेलौ छेलै । वै राशिद कें अगुआ करै के कोशिश करलकै, एकरा सें साफ मतलब छै कि एकरों पीछू जरूर कोय राज छै । आरो कोय महत्वपूर्ण राज छै । होना कें ई केस आबें बड़ा दिलचस्प बुझावै छै । आरो बीच में एक गिद्धो आवी गेलौ छै ।”

“गिद्ध ?” ब्रेशा आरो गजाला एक्के साथ बोली उठलै ।

“यानी कि वहाँ गिद्ध....चिड़ियाँ...जे एक दिन में आपनों वजन सें तीन गुणा ज्यादा माँस खाय लै छै ?” गजाला आचरज सें पूछलकै ।

“हों, वही गिद्ध । ऊ चिड़िया के बारे में आरो की जानै छौं ।”

“बहुत विस्तार से जानै छियै । जेना कि ऊ चालीस दिन, कभी-कभी एकरो से ज्यादा दिन तक बिना खाना खैले जीतों रहे सकै छै । दुनियाँ में गिद्ध के चौदह, पन्द्रह किस्म के प्रजाति पैलें जाय छै । कन्डोज, दक्षिणी अमेरिका के समुद्री किनारा, खास करी के पीरू, चीली, आरो योराग्रे में ढेरी संख्या में मिलै छै । डील-डौल में ई सब्हे गिद्ध से ज्यादा बड़ों होय छै । दायां पंख से ले के बायां पंख तक ओकरो शरीर के लम्बाई ग्यारह से पन्द्रह फिट के बीच देखलें गेलें छै । ओकरो माथा पर एक ठो छोटों रं कलगियो होय छै । कण्डूर गिद्ध दू किसिम के होय छै, जे मरी के माँस नै मिलला पर जीतों जानवर आकि चिड़ियाँ पर हमला करी खाय जाय छै । यहे तक नै, कभियो-कभियो ते ई कमजोर आदमी, बूढ़ा आरो दुधमुंहा बच्चो के चट करी जाय छै । मतरकि सामान्य तौर पर गिद्ध कण्डूर के तुलना में छोटे होय छै जे पंख फैलैला पर पाँच से ले के नौ फिट तक के होय छै । नर गिद्ध मादा गिद्ध के तुलना में छोटे हाये छै आरो एकरों वजन लगभग सात किलो तक के होय छै । ई किसिम के गिद्ध के गर्दन पतला आरो नंगा होय छै । गिद्ध हेने इलाका में पैलें जाय छै, जहाँ गरमी आरो धूप रहे । सख्त सर्दी आकि वर्षावाला इलाका में ई जीतों नै रहे पावें । यहू कहलें जाय छै कि गिद्ध के उमिर सौ साल तक के होय छै ।”

टन-टनन-टनन....कि तखनिये एकाएक फोन के घंटी बजी उठलै । फैसल ने हाथ बढ़ाय के फोन उठलकै । कुछ देर तांय बात करतें रहलै, फेनू फोन रखतें बोललै, “हमरा अभी बाहर जाना छै गजाला । गिद्ध के संबंध में एतें जानकारी वास्तें तोरा दाद दे छियौं । बाकी जानकारी दुसरो दिन जानवै । जाय के इजाजत दे ।”

फैसल के निकलतहें गजाला आरो दानिशो विदा होय गेलै । हुन्ने ब्रेशा के दिमाग आयको घटना में उलझी के रही गेलें छेलै ।

राशिद के नीन नै आवी रहलें छेलै । हेना के ऊ कल्हे से परेशान आरो

उलझलौं होलौं छेलै । कल देर रात गेला आरो पोस्टमार्टम होला के बादे ऊ अफजल रौं लहाश लै केँ घोर लौटलौं छेलै । तखनिये सें देखवैय्या रौं तांता बंधलौं होलौं छेलै । आय, बस तीन घंटा पहिलें अफजल केँ दफन करी देलौं गेलौं छेलै ।

तखनी रात के ग्यारह बजी रहलौं छेलै कि एकाएक फोन रौं घण्टी बजलै । वैं सोचें लागलै कि दिन भरी तें फोन के घण्टी बजतहें रहलै । हमदर्दी जताय वाला केँ ऊ धन्यवाद, धन्यवाद कहतें-कहतें थक्की गेलौं छेलै । आबेँ ई वक्ती नै जानौं के छेकै । ऊ पलंग सें नीचे उतरलै । तभिये माय आरो बाबू के ख्याल ऐलै । दोनों बगले के कोठरी में अचेत पड़लौं होलौं छेलै । दोनों केँ गश पर गश आवी रहलौं छेलै । यही तें डाक्टरें नींद के सूई दे केँ सुलाय देलें छेलै । घरों में आरो कोय छेलै नै । मुहल्ला के जनानी सिनी आखरी रस्म पूरा करी केँ आपनों-आपनों घोर लौटी गेलौं छेलै । बूढ़ी मामियो ई चोट बर्दाश्त नै करें सकलें छेलै आरो बीमार होय केँ बेटी केँ घोर रात के नौ बजे चल्लौं गेलौं छेलै ।

राशिद नें टेलीफोन के रिसेवर उठैतें बोललै, “हैलो ।” तें दोसरों दिश सें कोय्यो बेहद गुँलौं आवाज में कहलकै, “आबेँ तेरों बारी छौ ।” आरो टेलीफोन राखी देलकै ।

राशिद एक पल लेली कांपी उठलै ।

ऊ कुछ देर होने सहमलौं खड़ा रहलै । आखिर दोसरों दिश के छेलै? होना केँ तें ऊ एक निडर लड़का छेलै । इस्कूल में ओकरों बहादुरी के चर्चा छेलै । मतरकि कल सें लै केँ आय तक कदम दर कदम पर केँ घटना घटी चुकलौं छेलै, ये लेली ऊ बौखलैलौं होलौं छेलै । तहियो ओकरों दिमाग काम करी रहलौं छेलै । वैं टेलीफोन डायरेक्ट्री खोललकै । ओकरा सें पुलिस स्टेशन केरों नम्बर नोट करलकै । फेनू नम्बर डायल करी पूछलकै, “इन्सपेक्टर साहब छै ?”

दोसरों दिश सें आवाज ऐलै, “ई वक्ती हुनी आपनों घरों पर होतै ।”

“कृपा करी केँ हुनकों घर के नम्बर हमरा बतावौ ।” वैं नम्बर तें लिखी लेलकै, मतर सोचें लागलै कि डायल करौं कि नै करौं । मतरकि रुकलौं ऊ केना रहतियै । डायल करलकै ।

दोसरो दिश कुछ देरी लें घण्टी बजतें रहलै । फेनू हुन्नें सें इन्सपेक्टर के नींदवासलों आवाज सुनाय पड़लै, “हेलो, तोहें के ?”

“ओ हो इन्सपेक्टर साहब, हम्मं राशिद छेकां । बहुते लाचारी में ई वक्ती फोन करी रहलें छियौं । आपनें हमरा पहचानी लेलौ नी ? आय आपनें के दाफी हमरो घोर आवी चुकलें छें ।”

“मतर है तें बतावों कि ई वक्ती फोन कथी लें करलें छै ।” इन्सपेक्टर साहबें नरम आवाज में पूछलकै ।

“इन्सपेक्टर साहब, की बतैय्यौं । आबें हमरो जिन्दगी खतरा में छै । जबें हम्मं मैदान सें वापिस आवी रहलें छेलियै....जी...नै पहिलें दाफी कल....भाई जान के कल्ल रों बाद....लहाश लै कें गाड़ी सें ऐलें छेलियै, वहाँ तक तें कोय कठिनाई नै होलै । मतरकि जबें शाम कें वापिस आवै छेलियै तें रास्ता में हमरा अगुवा करै के कोशिश करलें गेलै । आरो अभी कुछुवे देर पहिलें फोन पर कल्ल करै के धमकी देलें छै । वें कहलकै कि आबें हमरो बारी छेकै ।

“के धमकी देलें छै ?”

“हम्मं नै जानै छियै, होना कें आवाज कोय मरद रें छेलै ।”

“अगुआ करै के कोशिश कौनें करलें छेलै ?”

“ऊ आदमी लम्बा कोट पहिननें छेलै । आरो शायत ओकरो दायं हाथ गायब छेलै । ओकरो दाढ़ी कारों-कारों छेलै, साथे-साथ वें आपनों आँखी पर कारों चश्मा लगैनें होलें छेलै । हौ तें कहों कि तीन टा भला मनुक्ख मिली गेलै, जिनके कारणें हम्मं बचें पारलौं ।”

ई सुनी इन्सपेक्टर रें चिन्तित स्वर उभरलै, “ऊ आदमी के तलाश तें हमरो छै, खैर तोहें बेफिकिर होय कें सुती जा । हम्मं अभी तुरत फोन करी दै छियै—तोरो हिफाजत वास्तें । दू सिपाही तोरो घर के बाहर तैनात करवाय दै छियौं ।”

राशिदें इन्सपेक्टर कें शुक्रिया कहलकै आरो इन्सपेक्टर के फोन राखतैं वहु फोन कें राखी बिस्तर पर लेटी गेलै ।

मतरकि तखनिये वें खिड़की रें शीशा पर केकरो दस्तक के आवाज सुनलकै । चेहरा घुमाय कें देखलकै तें ओकरो आँख आश्चर्य सें फैली कें रही गेलै । एक गिद्ध खिड़की के शीशा पर चोंच मारवो करी रहलें छेलै ।

रशीद मसहरी के डंडा उठाय कें खिड़की दिश बढ़लै, मतरकि एकबैगे ओकरोँ गोड़ थमी गेलै । फोन पर देलों गेलों धमकी ओकरा याद आवी गेलै आरो ऊ काँपी गेलै । वैं बढ़ी कें खिड़की के जाली लगाय देलकै आरो पलंग पर आवी कें बैठी गेलै । आबें नींद ओकरोँ आँखी सें कोसो दूर जाय चुकलों छेलै ।

अगलो दिन ओकरोँ यहाँ पुछारी करै वाला के तांता बंधलों रहलै । ऊ आपनै बेहद दुखित छेलै । बाबू आरो मम्मी रों दुखों के ओकरा अन्दाजा छेलै । दोपहर होतें-होतें ओकरा नींद आवें लागलै । फेनू खाना खाय कें ऊ सूतै रों तैयारी करिये रहलों छेलै कि एकटा छोटों रं बच्चा ओकरोँ घर के दरवाजा पर आवाज दिँ लागलै ।

ऊ दरवाजा पर पहुँचलै तें लड़कां कागज रों एक पुर्जा ओकरोँ हाथों में थमाय देलकै आरो बिना कुछ कहले निकली गेलै । अभी राशिद ओकरा रोक्है लें चाहै छेलै, मतर तखनी तांय तें ऊ अगला गली में मुड़ी चुकलों छेलै । वैं पुर्जा खोली कें पढ़लकै । जैमें लिखलों छेलै, बेटा राशिद,

रमन्ना रोड के जफर मेन्शन में तुरत पहुँचों । अफजल रों कातिल रों पता लागी गेलों छै । पुलिस इन्सपेक्टर हमरों साथें छै

तोरोँ चाचा

अब्दुल मतीन

चिट्ठी पढ़ी कें राशिद केरोँ देह काँपें लागलै । गुस्सा आरो बदला लै के भावों सें ओकरोँ दिमाग चलें लागलै । वैं जल्दी-जल्दी पैंट आरो कमीज चढ़ाय लेलकै । साथे-साथ जेबों में कुछ टाकाहौ डालतें बाहर आवी गेलै । माय दोसरोँ कोठरी में कोय जनानी साथें बैठलों छेलै आरो आपनों जवान बेटा रों मौतों पर लोर बहैवो करी रहलों छेलै । बाबू शायत सुती गेलों छेलै । दोपहर में खैला रों बाद हुनी सुती जाय के अभ्यस्त छेलै ।

बाहर निकलतैं सड़क पर एकठो टैम्पो मिली गेलै आरो ओकरा रमन्ना रोड पहुँचै में कोय कठिनाई नै होलै ।

पहरा पर तैनात एक सिपाही राशिद कें घर सें निकलतें आरो टैम्पो पर बैठतें देखलकै, तें वैं फोन करी कें थाना रों उपनिरीक्षक कें सावधान करी देलकै आरो आपन्है आपनों मोटर साइकिल पर ओकरोँ पीछा करें



लागलै । सादा लिबास में होला के कारणें केकरौ कोय शक्को नै हुएँ सकै छेलै । करीब-करीब पन्द्रह मिनिट तांय वै राशिद रौ टैम्पो केँ पिछुवैतें रहलै ।

रमन्ना रोड के नगीच राशिद टैम्पो सेँ उतरलै आरो तेजी सेँ जफर मेन्शन के दिश बढलै । सिपाहीं आपनों मोटर साइकिल एक दुकानी के सामनाहै में लगाय देलकै । नजदीक दुकान के बगले में कोय डॉक्टर के क्लिनिक छेलै ! वहाँ टेलीफोन कनेक्शन देखी केँ वै फोन करै के इजाजत मांगलकै आरो थाना में फोन करी, सब स्थिति सेँ इन्सपेक्टर केँ परिचित कराय देलकै ।

संयोगे सेँ वही वक्ती फैसल भी थाना पहुँचलौ होलौ छेलै । अब्दुल मतीन वहाँ पहिले से मौजूद छेलै आरो इन्सपेक्टर सेँ तुरन्त अपराधी केँ पकड़ै के अनुरोध करी रहलौ छेलै । फैसल रौ जवाब में अब्दुल मतीनें बतैलकै कि पिछला एक हफ्ता सेँ अफजल कुछ परेशान छेलै ।

हुनका सेँ यहौ मालूम होलै कि जे नवयुवक अधेड़ रौ हुलिया में मारलौ गेलौ छै, ऊ अफजल रौ दोस्त इनायत अली छेलै । ओकरा शायत पहिले सेँ ई पता छेलै कि अफजल पर हमला हुएँ वाला छै । ऊ या तेँ अफजल रौ हिफाजत करै लेली वैठां अधेड़ रौ हुलिया बनाय केँ गेलौ छेलै, या फेनू अफजल रौ दुश्मन बनी केँ । ओकरौ क्रिया-कलाप के जायजा लेलौ वैठां पहुँचलौ छेलै ।

“एकरौ मतलब तेँ यहौ होलै कि अफजल आरो इनायत केँ पहिले सेँ मालूम छेलै कि हेनौ हमला हुएँ सकै छै ।” फैसल नेँ कहलकै ।

“शायत वही आदमी राशिदो केँ धमकी देलै छै ।” इन्सपेक्टरें बतैलकै ।

“कहिया ?”

“राती, करीब-करीब बारह बजे । वही वक्ती हम्में दू सिपाही केँ वहाँ तैनातो करी देलै छेलियै । जै में एकेँ अभी सूचना देलै छै कि राशिद जफर मेन्शन गेलौ होलौ छै ।”

“ओहो, ई तेँ बड़ा खराब होलै । राशिद केँ असकल्लौ नै निकलना छेलै । हम्में ई पहलू पर ध्याने नै देलियै । खैर, चलौ, देर नै करौ । हमरा सिनी केँ फौरन जफर मेन्शन पहुँचना छै ।

राशिद जबें जफर मेन्शन पहुँचलै, तें ओकरा वहाँ सन्नाटा रं बुझलै—कुछ हेने कि जेना ऊ कोठी में एक्को टा आदमी नै रहें । ओकरा डोंर होलै, लेकिन तखनिये ओकरा आपनों पितयों अब्दुल मतीन के संदेश याद ऐलै । हुनिये हमरा यहाँ बुलैलें छै । हुनी खुद चाहै छै कि हत्यारा जेना हुएँ गिरफ्तार हुएँ । राशिदें आवाज देलकै, “चाचा जान...चाचा जान ।”

मतरकि कोय जवाब नै ऐलै ।

कुछ देर लेली वैं सोचलकै कि आबें ओकरा की करना छै । ऊ ई नतीजा पर पहुँचलै कि यहाँ तक आवी कें बेउम्मीद होय लौटवों ठीक नै । चाचा सें मिलिये कें लौटना चाही । संभव छै, हुनी कोय काम सें बाहर गेलों रहें । राशिद बुलन्द हिम्मत रों लड़का छेलै । इस्कूल में ऊ एन. सी. सी रों कमाण्डर आरो क्रिकेट के कैप्टनों रही चुकलों छेलै । वैं फेनू एक दाफी आवाज देलकै, “चाचा जान, तोहें कहाँ पर छों ?”

एक मिनिट बादे भीतरी बरामदा केरों दोसरों किनारी सें बूट के चरचराहट उभरलै । लागलै, जेना कोय अनाड़ी आदमी जूता पिहनी कें चलतें रहें । फेनू जल्दिये एक छाया बढ़तें नजर ऐलै । ऊ छाया कोय लम्बा आदमी रों छेलै । वैं देखलकै, वैं कारों रंग के कोट पिहनी राखलें छेलै । पैंटो कारे छेलै । आँखी पर कारों रंग के चश्मा छेलै आरो चेहरा पर ग्लोबन्द लिपटलों होलों छेलै । होना कें राशिदें अन्दाजा लगैलकै कि है आदमी वही छेकै, जे कल्हे ओकरा अगुआ करै के कोशिश करलें छेलै ।

ऊ चलतें-चलतें बरामदा में आवी कें रुकी गेलै । ओकरों तेज आँख राशिद कें एकटक घूरें लागलों छेलै ।

राशिद के हाथ-पाँव फूलें लागलै । ओकरों हिम्मत जवाब दिऐँ लागलों छेलै । कि डरों सें अनचोके ओकरों मूँ सें चीख निकली ऐलै । ऊ पलटी कें बाहर दिश दौड़ें लागलै, तखनिये कोय चीज ओकरों सामना में द म्माका के साथ गिरलै—जैठां ऊ अभी-अभी खाड़ों होलों छेलै । एकरे साथ राशिद के कानों में एक भयानक आवाजो गूंजी उठलै, “आबें तोरहे बारी छौ । आबें तोहें मरबे ।”

राशिद कें बुझलै, जेना ई आवाज जफर मेन्शन के दरवाजा सें निकली कें ओकरों कानों सें टकराय रहलों छै । भागतें-भागतें एक दाफी ऊ

गिरवो करलौं छेलै आरो ओकरों गोड़ों के चप्पलो निकली गेलों छेलै, मतरकि वैं चप्पल रों फिकिर छोड़ी देलें छेलै, कैन्हें कि बरामदा में मौजूद ऊ आदमियो ओकरों पीछू-पीछू दौड़ें लागलौं छेलै ।

सिपाही एक गाछ के पीछू खड़ा छेलै । वैं आपनों मोटर साइकिल जफर मेन्शन सें सौ गज दूरे राखी कें कोठी रों सामना आवी गेलों छेलै । वैं राशिद कें घबरैलौं बाहर ऐतें देखलकै तें ऊ चौकन्ना होय गेलै ।

कोठी के बाहर आवी राशिदें हिन्नें-हुन्नें सवारी के तलाश करलकै । थोड़ों आगू बढ़ी डॉक्टर रों क्लिनिक लुग ओकरा एकठो टैक्सी नजर ऐलै । ऊ व्हें दिश दौड़ें लागलै । टैक्सी के नगीच पहुँची कें वैं ड्रायवर सें कुछ कहलकै आरो दरवाजा खोली पिछुलका सीटों पर बैठी रहलै । ओकरों घबराहट देखी कें ड्रायवरें गाड़ी के रफ्तार एकदम तेज करी देलें छेलै ।

ठीक व्हें वक्ती जफर मेन्शन केरों दरवाजा पर गिद्ध उड़तें दिखाय पड़लै । ओकरों रुख टैक्सिये तरफें छेलै । सिपाही एक टक ओकरा देखें लागलै । ओकरों देखतहैं-देखतहैं गिद्ध टैक्सी के ऊपर जाय बैठलौं छेलै ।

कि तखनिये सिपाही कें आपनों ड्यूटी रों ख्याल ऐलौं छेलै । ऊ जल्दी सें आपनों मोटर साइकिल लुग पहुँचलै । किक लगाय कें इस्टार्ट करलकै आरो टैक्सी के पीछू दौड़ी पड़लै ।

कि तभिये गोलियो चलै रों आवाज गूंजी उठलै ।

मोटर साइकिल बेकाबू होय कें सड़क के एक दिश लुढ़की गेलै । गोली सिपाही के कंधा पर लागलौं छेलै । ऊ एक दिश जमीन पर जाय गिरलै । जों मेटर साइकिल एकाएक लुढ़की जैतियै तें आपनों सवारी के ऊपर गिरतियै । सौभाग्य सें मोटर साइकिल कुछ गज आगू जाय कें गिरलौं छेलै । ओकरों पहिया अभियो तांय घूमी रहलौं छेलै ।

राशिद आरो टैक्सी ड्रायवरें गोली चलै रों आवाज सुनलें छेलै । वैं दोनों बुझलकै कि गोली टैक्सी पर चलैलौं गेलों छै । ड्रायवर के गोड़ रों दवाब एक्सलेटर पर बढ़ी गेलों छेलै । आरो एकरों साथें टैक्सी एक झटका साथें तेज रफ्तार पकड़ी लेलकै । आबें ऊ हवा सें बात करी रहलौं छेलै । एकरों बावजूदो गिद्ध टैक्सी के ऊपरलका हिस्सा पर बैठलौं होलौं छेलै । आरो आबें आहिस्ता-आहिस्ता आपनों जग्घों सें खिसकी रहलौं छेलै ।

राशिद आरो ड्रायवर गिद्ध रों मौजूदगी सें एकदम बेखबर छेलै ।

राशिद आपना आप पर झुंझलैलों जाय रहलौं छेलै कि वैं घरों सें निकलै के गलतिये कैन्हें करलकै ।

कि हठाते गिद्ध उड़लै आरो विन्ड स्क्रीन के सामना आवी गेलै । वैं आपनों पंजा सें शीशा कें खुरचवो करी रहलौं छेलै । आरो पंजो मारी रहलौं छेलै ।

झायवरें राशिद दिश मुड़ी कें कहलकै, “तोहें संभली कें बैठों । हम्मैं ई गिद्ध कें अभी खत्म करी दै छियै ।”

आरो झायवरें हठाते ब्रेक लगाय देलकै । टैक्सी कें एक जोरदार झटका लागलै । टायर के आवाज दूर तांय गूजी उठलै । मतरकि गिद्ध नीचें गिरै के बदला ऊपर उड़ी गेलै । राशिदें काँपतें आवाज में कहलकै, “हमरा डर लागी रहलौं छै । ई गिद्ध बड़ी खतरनाक नजर आवै छै ।”

झायवरें हंसतें-हंसतें कहलकै, “अरे गिद्ध सें डरै छों । होना कें यहू घटना सें कम नै छेकै कि गिद्ध टैक्सी पर आवी कें बैठी रहलै ।”

झायवरें टैक्सी कें इस्टार्ट करी देलकै । ई गिद्ध सामान्य गिद्ध नांखी नै बुझावै छै ।”

“फेनू की छेकै ?” झायवरें पूछलकै ।

“हम्मैं नै कहें पारों ।”

ठीक वहे वक्ती कराहै वाला चीख सुनाय पड़लै ।

झायवरें मूड़ी बाहर करी कें देखलकै । गिद्ध टैक्सी के ठीक ऊपर छत सें लागलौं उड़ी रहलौं छेलै । झायवर के मूड़ी बाहर निकालतहैं गिद्धें गोता लगैलकै आरो ओकरो पंजा झायवर के बाँही सें टकरैलै । भाग्य छेलै कि तब तांय वैं आपनों मूड़ी भीतर करी चुकलौं छेलै । मतरकि बाँही पर हेने बुझाय रहलौं छेलै, जेना कोय वैठां मिरचाय भरी देलें रहें । इस्टियरिंग पर ओकरो हाथ कापें लागलै आरो देखतहैं-देखतहैं ओकरो आँखी के आगू अंधेरा नजर आवें लागलै । वैं गाड़ी रोकी देलकै आरो एक हाथों सें चोटैलों बाँह थामी लेलकै । फेनू ओकरो माथों इस्टियरिंग सें टकरैलै । आरो ऊ सीट रों नीचें लुढ़की गेलै ।

राशिदें ओकरा आवाज देलकै, फेनू ओकरा हिलावें-डुलावें लागलै, मतरकि तब तांय तें झायवर मौत के नींद सुती चुकलौं छेलै । राशिद घबराय कें आपनों सीट सें सट्टी गेलै । आकरो समझ में कुछुवो नै आवी रहलौं

छेलै कि आखिर ई सब होय की रहलौं छै ।

वैं एक दाफी फेनू गिद्ध रौं आवाज सुनलकै । वैं ओकरा झायवर दिश करौं दरवाजा के खुल्ला शीशा सें भीतर ऐतें देखलकै । राशिद जल्दी सें दरवाजा खोली कें बाहर निकली ऐलै आरो सड़क पर दौड़ें लागलै । सड़क के किनारी गाछ सिनी के कतार छेलै ।

कि हठाते राशिदे आपनौं गर्दन पर गिद्ध रौं पड़लौं पंजा कें महसूस करलकै । वैं भयभीत आँखों सें पलटी कें गिद्ध कें देखै के कोशिश करलकै कि तब तांय ओकरौं आँखों के आगू अंधेरा फैली गेलौं छेलै । आरो ऊ वहीं सड़क पर गिरी कें ढेर बनी गेलै ।

दुए-तीन मिनट बाद वैठां एक ठो कार आवी कें रुकलै । कार के झायवरें मूड़ी बाहर निकाली गिद्ध कें उड़तें हुँ देखलकै आरो तीन दाफी सीटी बजैलकै । गिद्ध तीर जकां उड़ते-उड़तें ओकरौं दिश ऐलै आरो कार में दाखिल होय गेलै ।

गिद्ध के कार में दाखिल होतैं कार हवा नांखी आगू बड़ी गेलौं छेलै ।

जीप इन्सपेक्टर चलाय रहलौं छेलै । फैसल, अब्दुल मतीन आरो दू सिपाहियो वैं पर सवार छेलै । जबें जफर मेन्शन के नगीच जीप रुकलै तें, सब्भे नीचें उतरी गेलै, तखनी शाम के बेरा होय रहलौं छेलै । सब्भे कोठी में दाखिल होलै । फैसल सब सें आगू छेलै ।

“यहाँ तें कोय्यो नै नजर आवै छै इन्सपेक्टर साहब, की तोरा विश्वास छौं कि फोन तोरे आदमीं करलें छेलौं ।” फैसल नें पूछलकै ।

“हों, हमरा पूरा विश्वास छै कि फोन सिपाही शर्मा रौं छेलै । कोय दूसरां फोन करी कें हमरा धोखा नै देलें छै ।” इन्सपेक्टरें पूरे विश्वास के साथ जवाब देलकै ।

“जौं तोरौं बात सच मानी लेलौं जाय तें, सिपाही कहाँ छै ?”

मानियो ला कि ऊ सिनी यहीं से कहीं गेलों होतै, मजकि सिपाही के तें चाही कि फोनों पर ई बातें के खबर दीं ।”

तब तांय हुनका सिनी के ई मालूम नै छेलै कि सिपाही जख्मी होय के गिरलें होलें छेलै, ऊ वक्ती कुछ मुसाफिर आरो पान वालां देखलें छेलै । वें सिनी पहिलें ओकरा डॉक्टर के क्लिनिक ले गेलों छेलै, मतरकि संयोगों से डॉक्टरो वहाँ मौजूद नै छेलै, यही ले सिपाही के एक टैक्सी में लादी के अस्पताल पहुँचाय ऐलें छेलै ।

कि तखनिये इन्स्पेक्टर रों मोबाइल के घंटी बजलै । थाना से फोन छेलै । ओकरा बतैलें गेलों छेलै कि सिपाही शर्मा अस्पताल में भर्ती छै । ओकरा गोली लगलें छै मतरकि ऊ खतरा से बाहर छै ।

घबड़ैलें होलें इन्स्पेक्टरें सब स्थिति फैसल के बतैलकै । जफर मेन्शन रों एकेक कोठरी देखी लेला रों बाद फैसल लॉन में ऐलै । ऊ चारो दिश आँख दौड़ाय रहलें छेलै कि हठाते एक झाड़ी के नगीच एक चीज पर ओकरो नजर ठहरी गेलै । ऊ एक पांव रों चप्पल छेलै ।

“दोसरो चप्पल केन्हे नी छै ।” इन्स्पेक्टर बड़बड़ैलै ।

“जों ई मानी लेलें जाय कि ई राशिद रों चप्पल छेकै, तें एकरा से दू बातों के अन्दाजा लागै छै । एक तें यही, कि राशिद यहाँ ऐलें छेलै आरो तबे ओकरो साथे जरूर कोय दुर्घटना घटलें छै । संभव छै कि ओकरा जबरदस्ती यहाँ से ले जैलें गेलें छै । तोरो सिपाहियो जख्मी होलें छैं । आवों, बाहर के लोगों से पूछताछ करलें जाय ।” फैसल ने बहुत सोच-विचार करतें कहलकै ।

बाहर निकललै तें, देखलकै कि लोग सिनी भीड़ बनाय के ओकरो जीप लुग खाड़ों होय गेलें छै । पूछताछ करला पर सिपाही के साथ दुर्घटना रों खबर पैलकै आरो यहू मालूम होलै कि कोठी से एक आदमी निकली के कार से दायां दिश गेलें छै । शायत वहीं गोलियो चलैने छेलै । सिपाही के मोटर साइकिल अभी तांय सड़क रों किनारी लुघड़लें होलें छेलै ।

फैसल ने यहू मालूम करलकै कि जफर मेन्शन रों मालिक जफर साहब आपनों अहल्या साथे हज करैलें गेलें होलें छै । मकान में ताला बन्द छेलै, मतरकि आय कोय साहब यैमें कार समेत ऐलें छेलै । होना के रात में ई मकान के हिफाजत लेली यहाँ कोय आदमियो सुतै छै ।

फैसल ने एक सिपाही रॉ ड्यूटी मोटर साइकिल के पास लगैलकै आरो दुसरा कें अस्पताल भेजी आपने जीपों पर बैठी गेलै । आबें ऊ दायां दिश कंकड़बाग तरफ जाय रहलौ छेलै । इन्सपेक्टर आरो अब्दुल मतीनो साथें छेलै ।

“संभव छै कि राशिद घोर लोटी गेलौ रहें ।” इन्सपेक्टरें उम्मीद जाहिर करतें कहलकै ।

“आपनों चप्पल छोड़ी कें ?” फैसल ने व्यंग्य के स्वर में कहलकै, “होना कें आपनों तसल्ली लें फोनो करी कें पूछी ला ।”

ई सुनी इन्सपेक्टर खामोश होय गेलै । फैसल आपनों विचारों में डुबलौ रहलै । वैं सोची रहलौ छेलै कि दुश्मन रॉ इरादा खाली डरावै-धमकावै रॉ नै छेलै । राती जे किसिम सें वैं फोन पर धमकी देलें छेलै, वही किसिम सें वैं दोसरो रास्ता अपनावें सकै छेलै । ओकरा जफर मैन्शन कैन्हें बुलैलौ गेलै आरो एतें आसानी सें केना चल्लौ गेलै ? राशिद कें जों परेशाने करना होतियै तें दू-चार रोज बाद ओकरा ऊ वक्ती घेरलौ जैतियै, जखनी ऊ इस्कूल जैतें होतियै । निस्संदेह अपराधी जाने सें मारै के इरादा राखै छेलै । शाम के वक्ती रमन्ना रोड उपयुक्ते रहै छै । अधिकांश लोग तें घरे में रहै छै आकि फेनू बिजनेस के गरज सें मुहल्ला सें बाहरे रहै छै, आकि फेनू क्लब जाय चुकलौ रहै छै । यहू नै तें सिनेमा हॉलौ में बैठी कें वक्त गुजारतें रहै छै ।

जीप जबें आगू कुछ दूर निकली ऐलै तें, फैसल ने एक ठियां सड़क के किनारी भीड़ देखलकै, जे दू जग्धा पर छेलै । पुलिस रॉ लोग भीड़ कें हटावै में लागलौ होलौ छेलै । जीप देखतैं एक उपनिरीक्षक जीप के करीब आवी गेलै । फैसल आरो इन्सपेक्टर कें देखतैं सैल्यूट मारलकै ।

इन्सपेक्टर रॉ जीप देखतैं आरो हुनका सिनी कें उतरतें देखी कें भीड़ भोरकों अन्हार नाँखी छटें लागलै । सिपाही कें सैल्यूट मारतें भीड़ समझी गेलौ छेलै कि कोय बड़ौ पुलिस अफसर पहुँची गेलौ छै ।

“यहाँ की होलौ छै ?” फैसल ने पूछलकै ।

“हुजूर, यैठां दू लहाश पड़लौ होलौ छै । एक टैक्सी ड्रायवर रॉ आरो दूसरौ एक लड़का करौ छेकै ।”

“लड़का करौ ?” फैसल ने चौकी कें पूछलकै ।

“जी हों, हुन्नें सड़क के किनारी लड़का रों लहाश छै ।”

फैसल तेजी सें आगू बढ़लै । वै लहाश केँ एकदम करीब सें जाय केँ देखलकै तें राशिदे छेलै ।

“आखिर दुश्मनें धमकी पूरा करी देलकै ।” इन्सपेक्टर बोली पड़लै ।

“मजकि अभियो एकरों बदन में गर्मी बाकी छै । रुकी-रुकी केँ सांसो आवी रहलौ छै । जल्दी करों, एकरा उठावों आरो अस्पताल लै चलौ ।” फैसल नें कहलकै आरो जीप दिश बढ़लै । ड्रायवर पहिलें जीप पर बैठी चुकलौ छेलै ।

रास्ता में फैसल नें राशिद रों तलाशी लेलकै । कुछ रुपया के अतिरिक्त ऊ पुर्जो मिललै, जैमें जफर मेन्शन तक आवै रों संकेत छेलै । फैसल नें देखलकै कि राशिद के कंधा पर गिद्ध रों पंजा के निशान छेलै आरो तीन सुराखो । वहेँ रं बीच वाला सुराख बहुत गहरा छेलै ।

“ड्रायवरो केरों बाँही पर पंजा रों होने निशान छै ।” एक सब इन्सपेक्टरें बतैलकै, जे राशिद के देह केँ संभाललें होलौ छेलै ।

फैसल नें अब्दुल मतीन दिश होय केँ कहलकै, “ई पूजा देखों ! की ई पुजा तोरों हाथ के लिखलौ छेकै ?”

अब्दुल मतीन आँख फाड़लें लिखावट केँ देखलें जाय रहलौ छेलै । फेनू थूक निगलतें ऊ बोललै, “ई हमरों लिखलौ नै छेकै । हमें राशिद केँ जफर मेन्शन नै बुलैलें छेलियै । हममें तें थाना रों इन्सपेक्टर साहब रों पास छेलियै । तोहूँ हमरा देखलें छौ । जोँ हममें ई पुजा लिखी केँ राशिद केँ बुलैलें होतियै तें, जफर मेन्शन में होतियै । तोरा सिनी के पास नै होतियै ।”

“ई दलील कमजोर लागै छै । हममें पूछै छियौं कि तखनिये थाना में कैन्हें छेलौ ? आरो हमरे साथ-साथ कैन्हें घूमी रहलौ छौ ? की ई किसिम सें तोहें आपनों निरपराध होय के सबूत नै राखै लें चाही रहलौ छौ ? राशिद रों हत्या तोहें आरो केकरोँ जिम्मा में लगैलें होभौ । बेचारा ड्रायवर तें मुफ्ते में मारलौ गेलै ।”

“तोहें हमरा कसम खिलाय लें । हममें बेगुनाह छी । तोरा शायत मालूम नै छौं कि रिश्ता में हममें राशिद रों चाचा लागै छी । ई हमरों बेटा छेकै । हममें भला एकरा केना कत्ल करावें पारौं ।”



“हमें तोरा पर इल्जाम नै लगाय रहला छियौं ” फैसल नें कहलकै, “बलुक आपनों शक जाहिर करी रहलौं छियौं । कोय्यो शक करे सकै छै । होना के दुश्मन जे कोय्यो छेकै, वें बड़ी होशियारी सें काम करलें छै । तोरों दिश सें चिट्ठी लिखी के राशिद के जफर मेन्शन बुलवैलकै आरो ओकरो हत्या करे के कोशिश करलकै । कत्तें दुख रौं बात छेकै कि पहिलें तें अफजल रौं हत्या करलौं गेलै, फेनू इनायत अली के खून होलै आरो आबें टैक्सी ड्रायवरो के मारी देलौं गेलौं छै । ई सब्भे अपराध एक्के आदमी करलें छै । राशिदो के वही मृतप्राय करी देलें छै ।”

अस्पताल आवी चुकलौं छेलै । राशिद के इमर्जेन्सी वार्ड में भर्ती करैलौं गेलै आरो जत्तें डाक्टर ड्यूटी पर मौजूद छेलै, सब्भे के ओकरो देखभाल में लगाय देलौं गेलै । सिपाही शर्मों सें जाय के फैसल आरो इन्सपेक्टर मिललै आरो ओकरा हिम्मत बंधैलकै ।

वापसी वक्ती फैसल नें इन्सपेक्टर सें कहलकै, “अब्दुल मतीन साहब सें कही दौ कि यही वक्ती सें हुनी आपना के हिरासत में समझौ । मतरकि जेलों में नै रहतै, बलुक आपनों घरे पर रहतै । अभी हुनका जावें दौ आरो हुनका ई जिम्मा लगावौ कि राशिद के घरवाला के खबर करौ ।”

घोर पहुँची के फैसल नें जीप वापिस करी देलकै । ड्रायंग रूम में जेन्है गोड़ राखलकै कि देखलकै—ब्रेशा, गजाला, दानिश आरो फराज ओकरो इन्तजारी में बैठलौं छै । फैसल नें फराज के देखतें कहलकै, “ओहो, तें आपने अवतार लै लेलियै । परसुए सें युनीवर्सिटी कैम्पस सें हेनो गायब होला, जेना गधा के माथा सें सिंघ । हममें नै जानै छेलां कि तोहें एत्तें डरपोक किसिम के लोग सचमुचे में छौं ।”

“जी, बात ई छेलै कि.....”

“सफाई दै के जरूरत नै छै । तोहें दानिश के दोस्ते नी छेका... अच्छा ई सब हटावौं....हौं तें ब्रेशा, की होय रहलौं छै ?” फैसल नें बात

काटते कहलकै ।

“बस तोरे इन्तजार होय रहलौं छै ।”

“बस इन्तजारे, की कुछ कामो ?”

“तोरों देलों काम पूरा करी चुकलौं छी; पोस्टमार्टम रिपोर्टों तें मानलें छियै । साथे साथ यहू मालूम करी ऐलों छियै कि अफजल रों साथ जे लहाश पैलों गेलों छै, ऊ ओकरो दोस्त इनायत अली के छेकै ।”

“शाबास, तोहें तें एकदम सच-सच काम करलें छों । इनायत अली के बारे में हमरौ मालूम होय चुकलौं छै, आरो अभी कुछवे देर पहिलें राशिदो पर प्राणघातक हमला होलौं छै । एक टैक्सी ड्रायवरो मारलौं गेलों छै ।

“मतरकि है सब केना आरो कैन्हें होलै ?”

“बतावै छियौं । पहिलें पोस्टमार्टम रिपोर्ट तें लानों ।”

ब्रेशां तुरत रिपोर्ट प्रस्तुत करी देलकै, जेकरा पर नजर डालतें फैसल नें कहलकै, “हमरों शक एकदम सही निकललै । दोनों मौत जहरे देला सें होलौं छै । आयकों घटना यहें कहानी कहै छै ।”

“है बीच में जहर कहाँ सें आवी गेलै, जबें कि अब तांय गोलिये चलतें रहलौं छै ।”

“यही तें रहस्य छेकै, जेकरों दिश केकरो नजर नै गेलों छै । मौत रों असली कारण गिद्धे छेकै ।”

“गिद्ध ?” ई सब सुनी सब्भे हैरान होय रहलौं छेलै ।

“हों गिद्ध । ई काम लेली जॉन गिद्ध के इस्तमाल करलौं गेलों छै, ओकरा खास तौर पर ई ट्रेनिंग देलौं गेलों छै कि कबें आरो केकरा पर हमला करना छै । एकरों वास्तें ओकरो पंजा में जहर लगाय देलौं जाय छै । ई जहर है कदर तेज असर करै छै कि आदमी के खून में जैहैं, सीसे देहों में बिजलिये नाँखी दौड़ें लागै छै आरो देखतैं-देखतैं ऊ आदमी रों मौत होय जाय छै ।

“तें राशिद केना बची गेलै ?”

“भगवान के लीला कही ला । यहू संभव छै कि ड्रायवर पर हमला करै वकती ओकरो पंजा रों जहर छूटी गेलों रहें । निश्चित रूपों सें कहलौं जावें सकै छें कि राशिद पर हमला बाद में होलौं छै ।

“आश्चर्यजनक, की है संभव छै ?” फराज बोललै ।

“आयकों तेज रफ्तार रों जिन्दगी में कुछुयो असंभव नै छै । फेनू ई सब तें हमरों आँखी रों सामना में घटी रहलौ छै । हों तें गजाला, हम्में तोरा सें गिद्ध रों बारे में आरो विशेष बात जानै लें चाहवै । परसू जे कुछु बतैलें छेलौ, वैंसें ई केस में हमरा फायदा पहुँची रहलौ छै ।”

“आरो की बतैय्यौं । गजालां इन्कार में मूड़ी हिलैलकै ।

“जे कुछु आरो जानतें रहों, कही दा । हुएँ पारें तोरों नजरी में ऊ बात खास नै रहें, मजकि हम्में वही सें कोय महत्वपूर्ण सुराग निकाली लौं ।”

ई सुनी दानिश कहलकै, “गिद्ध के बारे में हमरों अध्ययन सही छै । सुनों, मादा गिद्ध एक दाफी में बस एक्के अण्डा दै छै । ई सामान्यतः सफेद आकि मटिया रंगों के होय छै । अधिकांश किस्म में बयालिस सें लै कें एक सौ बीस दिन तांय अण्डा सेला के बाद बच्चा निकली आवै छै । बच्चा सिनी के भरण-पोषण के भार नर गिद्धे पर रहै छै आरो नर गिद्ध जबें खाना जुटाय दै छै तें, मादा गिद्ध बड़ा चाव सें दाना कें बच्चा सिनी के मुँहों में डालै छै । तेज उड़ै वाला चिड़िया के खास ठिकानों होय छै । उड़ै सें पहिलें ई मुर्ग नाँखी पंख फड़फड़ावै छै, मतरकि बहुत ऊँचा तांय नै उड़ै सकै छै । प्रायः ई समझलौं जाय छै कि गिद्ध खाली माँसे पर जीवन निर्वाह करै छै, मजकि है सोचवों गलत छेकै । यूरोप के कुछ हिस्सा में गिद्ध रों कुछ हेनो किस्म पैलौं जाय छै, जेकरा पामण्ट कहलौं जाय छै । ई गिद्ध माँस एकदम नै खाय छै । आरो हरा अखरोट आकि हेने दोसरों किस्म के सुखलौं फलों सें जीवन गुजर करै छै । कुछ गिद्ध माँस साथें छोटों-छोटों मछलियो, समुद्री कीड़ा-मकौड़ा, यहाँ तक कि गन्दगियो खाय छै । कोय तें जानवर रों सीना आकि खोपड़ी छोड़ी कें बाकी हड्डियो तक तोड़ी कें ओकरों भीतर के गूदा निकाली कें खाय जाय छै । चिड़ियां में गिद्ध सबसें ज्यादा तेजी सें माँस खाय वाला जीव छेकै । एक दाफी बाइस गिद्ध मिली कें बस साढ़े तीन घण्टा में एक भैंस के सब्भे माँस कें खाय गेलै । हेने एक घटना आरो छै कि दस गिद्ध मिली कें भेड़ के एक बच्चा के माँस खाय में सिर्फ एक मिनिट लगैलें छेलै । उड़ान के वक्ती ई बहुत खामोश रहै छै, जबें कि माँस खाय वक्ती ई खुशी सें चीखतें रहै छै । गिद्ध रों नजर बहुत तेज होय छै आरो ई कै सौ फिट रों उँचाइयो पर उड़तें रहला के बादो धरती पर आपनों शिकार देखी लै छै । एक बात आरो कि गिद्ध में धैर्य धरै के साहस बड्डी होय छै ।

कभियो-कभियो ई कै-कै दिन तांय आपनों शिकार के मरै के इन्तजार करतें रहे छै । हौ दिनों में ऊ आपनों चोंच के पंख में दबैलें ऊँघतें रहे छै । बस बीचों बीचों में नजर उठाय कें जानवर कें देखी लै छै । ताजा मरी कें तुलना में धूप सें सड़लों-गललों माँस कें यें ज्यादा पसंद करै छै । यहू जानी ला कि गिद्ध में सूधै रों शक्ति बहुते कम होय छै ।”

अभी दानिश शायत आरो कुछ बोलतियै कि तखनिये एक सिपाही के आवै के खबर मिललै । फैसल नें ओकरा ड्रायंग रुमे बुलाय लेलकै आरो पूछलकै, “की बात छेकै ?”

“हुजूर, आपनं रों फोन काम नै करी रहलें छै, यही लें इन्सपेक्टर साहबें हमरा फोन करलकै कि हुनकों पास एक ठो आदमी ऐलों होलों छै, जेकरा लै कें इन्सपेक्टर साहब आपनं रों पास आवै लें चाहै छै । जों आपनं कहों तें, हुनी तुरते लै कें आवी जाय ।”

“जा, इन्सपेक्टर साहब सें कही दौ कि हौ आदमी कें लै कें आवी जाय ।”

सिपाही के जैहें फैसल नें कहलकै, “दानिश हमरा सिनी कें बीचे में रुकी जाय लें पड़ै छै, मतर एतना बात जरूर छै कि गिद्ध के बारे में तोरों आरो गजाला के जानकारी बेशक विस्तृत छै, आरो जत्तें जानकारी तोरा दोनों देलें छौ, वै लें धन्यवाद । वास्तव में ई बार के में केस गिद्ध सें शुरू होय छै । कोय आदमी गिद्ध सें काम लै कें फोन करलें जाय रहलें छै—सचमुच में केस बड़ी पेचीदा आरो उलझलें होलों छै । अपराधी आँखी के सामना में दिलेरी सें आपनों काम करलें जाय रहलें छै, आरो हमरा सिनी ओकरों बारे में अभी तांय कुछुवो नै जानै छियै । यहू नै जानें पारलियै कि आखिर खून कैन्हें होय रहलें छै ।”

“बेशक ई दाफी तोहें बड़ी कठिनाई महसूस करी रहलें छौ ।” गजाला बोललै ।

“नै, कठिनाई रों बात नै छेकै । आय न कल अपराधी कें गिरफ्तार तें होने छै । जुर्म करी कें कोय बचे नै पारें । हम्मं तें बस एतनै चाहै छी कि बस आबें आरो केकरो खून नै हुएँ । आदमी रों जिन्दगी एतना सस्ता नै होय छै कि जबें कोय चाहें, खतम करी दें ।

“हमरों जिम्मा कोय काम हुएँ तें बतावों ।” दानिश बोललै ।

“अभी नै, धन्यवाद । हम्मं खुद्दे हर चीजों पर नजर राखलें होलों छियै । अभी तांय तोरों सिनी के जरूरत नै महसूस करी रहलें छियौं । बाद में कष्ट जरूरे देभौं ।”

कि तखनिये इन्सपेक्टर एक आदमी साथें आवी पहुँचलै । वैं ऊ तीस-बत्तीस साल युवक सें परिचित करवैलकै, “हिनी अनीसाबाद कॉलोनी सें ऐलों छै । हिनकों नाम युसुफ छेकै । बड़ी घबरैलों होलों छै ।”

“कैन्हें ?” फैसल नें पूछलकै ।

“हिनकों पास एक ठो चिट्ठी छै ।”

“केन्हों चिट्ठी ?”

“आपन्हें देखी ला नी ।” इन्सपेक्टरें युसुफ सें चिट्ठी लै कें फैसल दिश बढ़ाय देलकै । फैसल नें चिट्ठी खोली कें पढ़ना शुरू करलकै । वैं में लिखलें छेलै—“अफजल रों बाद आबें तोरो बारी छौ । ओकरोँ एक दोस्त इनायत अली खतम करी देलें गेलै, तहूँ ओकरोँ दोस्त छेकें, आबें तोरे बारी छौ । आरो तोरों बारी कैन्हें ऐलों छै, तोहें आपन्है जानें सकै छें । तोरों मौत निश्चित छौ । तोरा कोय्यो नै बचावें पारें ।”

चिट्ठी पढ़ी कें फैसल नें युसुफ सें पूछलकै, “की तोहें बतावें पारै छौ कि अपराधी कौन घटना कें याद करै के संकेत करलें छै ?”

“नै, हम्मं कुछ नै जानै छियै । हम्मं कोय हेनोँ काम नै करलें छियै । हम्मं अफजल रों दोस्त जरूरे छेलियै, मतरकि अफजल नाँखी हमरोँ जिन्दगी बेदाग रहलें छै । नैं जानौं, ई अपराधी की चाहै छै । आबें हमरा धमकी दे रहलें छै ।”

“की तोरहौ क्रिकेट सें दिलचस्पी छौं ?”

“कभियो दिलचस्पी छेलै । पिछलका दू, ढाई साल सें मतर आबें कहाँ खेलै छियै ।”

“कैन्हें ?”

“हमरोँ आँखे कमजोर होय गेलों छै ।”

“अनीसाबाद कॉलोनी में तोहें कहाँ रहै छौं ?”

“रोड नं. दस, क्वार्टर न. अठारह में ।”

“अच्छा तें तोहें जा, हम्मं तोरों हिफाजत के इन्तजाम करवाय छियौं ।”

युसुफ धन्यवाद कही कें जेन्है निकललै, फैसल नें दानिश आरो फराज सें कहलकै, “तोरा दोनों हिनकों पीछू-पीछू जा, हिनकों हिफाजत होना बहुते जरूरी छै ।”

आरो दोनो के निकलना छेलै कि फैसल नें इन्सपेक्टर सें कहलकै, “तोहें फौरन दू सब इन्सपेक्टर कें युसुफ के घरों पर तैनात करवाय दौ । ओकरो मौत हमरों सबसें बड़ों हार होतै । हममें नै चाहै छियै कि बिना कारणे बेचारा के खून होय जाय ।”

सब बात सुनी कें जबें इन्सपेक्टरो चल्लों गेलै तें वें गजाला सें कहलकै, “आबें तोहें घर जा । हमरा अभी ढेर सिनी काम कें निपटाना छै ।”

गजाला चल्लों गेलै तें फैसल नें ब्रेशा सें कहलकै, “ई केस में तोहें कोय खास काम नै करलौ छै—खाली आपनों दोस्त साथें गप हाँकै के । अच्छा, आबें उठों आरो जल्दी सें तैयार हो जा । हमरा अभिये अनीसाबाद कॉलोनी जाय लें पड़तै । रिवाल्वर राखी ला ।”

“अनीसाबाद कॉलोनी कैन्हें ?” ब्रेशां चकित होतें पूछलकै ।

“यै लें कि आयकों रात युसुफ पर हमला जरूरे होतै । हत्यारा जबें राशिद कें धमकी देलें छेलै तें वहू रात में हमला होलौ छेलै । हमरा पूरा विश्वास छै कि आयकों रात युसुफ पर जरूरे हमला होतै आरो हममें अपराधी कें देखै लें चाहै छियै आरो खुद ओकरा पर हमलौ करै लें चाहै छियै हेनों मौका फेनू हाथ नै आवै वाला छै । दानिश आरो फराज के आँखी में ऊ धूल झोंकें सकै छै, कोय शक नै कि अपराधी बड़ी शातिर छै ।”

फैसल नें आपनों कार निकाली लेलकै आरो आपन्हें सें हाँकें लागलै । ब्रेशा अगुलका सीटों पर बैठलौ छेलै ।

जबें ऊ दोनों अनीसाबाद के सड़क नं. दस पर पहुँचलै आरो क्वार्टर नं. अठारह के सामना सें गाड़ी आगू बढ़लै तें, फैसल नें महसूस करलकै कि वहाँ जरूरत सें ज्यादा सन्नाटा छै । वें आगू जाय कें पीपल गाछी के नीचें गाड़ी खड़ा करी देलकै । आरो टहलतें होलें पैदले युसुफ रों क्वार्टर दिश लौटी पड़लै ।

फैसल नें देखलकै, तखनिये क्वार्टर नें अठारह के सामना एक टैम्पो आवी कें रुकलै । यहू देखलकै कि वैसें युसुफ उतरलै आरो टैम्पो वाला कें

किराया दै कें गेट के भीतर मुड़ी गेलै ।

टैम्पो वापिस जाय चुकलौ छेलै । फैसल तेजी सें आगू बढ़ले छेलै कि सामना सें कोय गाड़ी के हेड लाइट चमकी उठलै । गाड़ी तेजी सें आवी रहलौ छेलै । ऊ सड़क के किनारी होय गेलै । गाड़ी ओकरो नगीच आवी कें रुकी गेलै । अफजल नें देखलकै—ओकरा सें दानिश आरो फराज उतरी रहलौ दै । बड़ी तेजी में दानिश नें ड्रायवर के किराया थमैलकै आरो गाड़ी कें विदा करी देलकै । फेनू फैसल के नगीच होतें आश्चर्य सें पूछलकै, “तोहें यहाँ ?”

“हों, हम्मू स्थिति कें जांचै-परखै लें यहाँ तक आवी गेलौ छियै । आरो ब्रेशा के मशविरा के मुताबिक हम्मं क्वार्टर में दाखिल होय के कोशिश करवै ।” फैसल नें जवाब देलकै ।

दोनो के गेला रों बाद फैसल आगू बढ़लै । ऊ अभी क्वार्टर रों गेट के नगीच पहुँचले छेलै कि वें गिद्ध रों आवाज सुनलकै । नजर उठैलकै तें देखलकै कि छत्तों पर बैठलौ एक गिद्ध ओकरहै घुरी रहलौ छै । गिद्ध पर आँख गड़लै ऊ गेट के भीतर दाखिल होय गेलै । सामना के कोठरी में ओकरा कोय्यो नजर नै ऐलै । मतरकि भीतर के कोठरी में कुछ खटपट होय रहलौ छेलै । ऊ सोचै लागलै कि अन्दर जावं की नै जावं । कि तभिये केकरो चलै के आहट सुनाय पड़लै । भीतर सें कोय बाहर दिश आवी रहलौ छेलै । फैसल नें हिन्नै-हुन्नै देखलकै । देखलकै कि बरण्डा के किनारी सें लागलौ एक चौकी खड़ा छै । ऊ ओकरे पीछू छुपी गेलै ।

भीतर सें जे आदमी बाहर निकललौ छेलै, वें लम्बा कोट पहनलौ होलौ छेलै । कोट के रंग कारौ छेलै । पैण्टो वहे रंग के छेलै । आँखों पर चश्मा चढ़लौ होलौ छेलै । दायां हाथ के आस्तिन झूली रहलौ छेलै ।

देखतहैं-देखतहैं ऊ आदमी गेट सें बाहर निकली गेलौ छेलै आरो आहिस्ता-आहिस्ता सीटी बजावें लागलौ छेलै । तीसरौ सीटी पर गिद्धें एक करैहलौ रं आवाज निकाललकै आरो ओकरो कंधा पर आवी कें बैठी गेलै ।

फैसल के दिमाग बड़ी तेजी सें काम करै लागलौ छेलै । ऊ चौकी के पीछू सें निकली कें तेजी सें गेट दिश बढ़लै । ओकरो दायां हाथ में रिवाल्वर छेलै ।

ऊ आदमी तेजी सें आगू बढ़लौ छेलै आरो सड़क नं. नौ दिश बड़ी

गेलों छेलै । फैसल नें देखलकै, कि ऊ एक कार में सवार होय रहलौ छै । आपनों कार तक पहुँचै के वक्त ओकरो पास नै छेलै । ऊ तेज-तेज कदम बढ़ाय के कार के करीब पहुँचै ले चाहै छेलै, मतरकि कार इस्टार्ट होय चुकलौ छेलै । वैं दायां हाथ आगू करी के कार के पिछुलका टायर पर निशाना साधलकै आरो गोली चलाय देलकै । कार लड़खैलै आरो ठाड़ों होय गेलै । ऊ आदमी खिड़की सें माथों बाहर निकाली के फैसल दिश देखलकै । फेनू ओकरो एक हाथ खिड़की सें बाहर किनललै आरो छलांग मारी के आपनों जग्घा सें हटी गेलै । कि तखनिये सड़कों पर बम फटलै, जेकरा धुआँ एकदम घन्नौ छेलै ।

फैसल आबें कार दिश दौड़ी रहलौ छेलै । गिद्ध ऊ आदमी के कंधा पर अभियो तांय बैठलौ होलौ छेलै । फैसल जॉन तेजी सें दौड़ी रहलौ छेलै, ओकरा सें बेसिये आगू वाला भागलौ जाय रहलौ छेलै । फैसल नें अन्दाजा लगैलकै कि यै किसिम सें ऊ आदमी कोय मोड़ पर घुमी के नजर सें गायब हुए पारें । छुपें पारें । वैं आपनों रफ्तार कम करी देलकै आरो एक बार फेनू हाथ आगू करी गोली चलाय देलकै । गोली लगै भर के देर छेलै कि ऊ आदमी मुँह के बल जमीन पर गिरी पड़लै । ई देखी फैसल फेनू दौड़ें लागलै । घायल आदमी उठै के कोशिश करी रहलौ छेलै । तखनी गिद्ध ओकरो माथों के ऊपर उड़ी रहलौ छेलै ।

जबें फैसल ऊ आदमी के नगीच पहुँचलै, तखनी ऊ आपनों एक टांग पकड़लें घिसटी रहलौ छेलै ।

“आबें तोरों कोय्यो कोशिश व्यर्थ होतौ । एक तें पहिलें सें तोरा एक हाथ नै छौं । इखनी एक टांगो घायल होय चुकलौ छौं आरो हमरों रिवाल्वर में इखनियो चार गोली बचलौ होलौ छै । तोरों दुसरो हाथ आरो दुसरो टांग घायल कखनियो करे सकै छी ।” फैसल ओकरो एकदम नगीच पहुँचतें कहलकै ।

बम के धमाका आरो गोली के आवाज के कारण आसपास के क्वार्टर सिनी के खिड़की सब खुलें लागलौ छेलै । फैसल नें आवाज दे के कुछ लोगों के बुलैलकै । जबें चार-पाँच लोग आवी गेलै तें वैं पुछलकै, “तोरा सिनी में से केकरो पास मोबाइल छौं ? हमरों मोबाइल यहीं कहीं गिरी चुकलौ छै । नै तें क्वार्टर में जाय के फोने सें पुलिस इस्टेशन खबर करी दी



कि फैसल नें इन्सपेक्टर कें तुरत बुलैलें छै । सड़क नं. नौ पर खाड़ों छै ।”

“तोहें, तोहें, यानी कि जासूस फैसल....? कुछ लोगों के मुँहों सें हठाते आवाज निकललै आरो वैं सिनी आचरज सें ओकरो दिश देखें लागलै । एक आदमी आपनों क्वार्टर दिश दौड़लें गेलै, ताकि जल्दी सें जल्दी थाना खबर करें सकें ।

“जों कष्ट नै हुआँ तें तोरा सिनी कें एकटा तकलीफ दै लें चाहै छी । ई आदमी खूनी अपराधी छेकै । यें अब तांय पाँच, छों खून करी चुकलें छै । बड़ी मुश्किल सें गिरफ्तार हुएँ पारलें छै । हम्में कुछ देर लेली एकरा तोरा सिनी लुग छोड़ै लें चाहै छी । सड़क नं. दस में यें कोय दुर्घटना करलें छै । हमरों कुछ आदमी वहीं छै । हम्में सड़क नं. दस पर जाय लें चाहै छियै । तोरा सिनी तब तांय एकरों निगरानी करतें रहियौ । ई भागें नै पारें ।”

“केन्हों कें नै भागें पारतै, हमरा सिनी एकरा घेरलें राखवै ।” तीन चार आदमी आगू बढ़तें जोशीला आवाजों में बोललै आरो घेरा बनाय कें खाड़ों होय गेलै ।

“होना कें सावधानी लें हम्में एकरा बेहोशी के सूय्यो लगाय दै छियै ।” फैसल नें आगू बढ़ी कें रिवाल्वर रों दस्ता ओकरो माथों सें सटाय देलकै आरो देखतैं-देखतैं ऊ आदमी के माथों लुढ़की गेलै । ऊ बेहोश होय चुकलें छेलै ।

फैसल ओकरो अचेत होलों शरीर कें कुछ देर लें देखतें रहलै आरो कुछ सोचतें रहलै, तबें बोललै, “तोरा सिनी में सें दू आदमी कें तकलीफ देभौं । हम्में एकरा यहाँ नै छोड़ै लें चाहै छियै । हमरों मदद करों आरो एकरा सड़क नं. दस तक लै चलें । जों ऐ बीचों में पुलिस आवी जाय तें ओकरा सड़क नं. दस पर भेजी दियौ । रास्ता में हमरों मोबाइलो देखतें जइयों । शायत कहीं गिरलें पड़लें रहें ।”

एक नौजवानें ऊ बेहोश होलों आदमी कें आपनों कंधा पर लादी लेलकै । दुसरो ओकरा सहारा देलें होलें छेलै । ढेरे लोगो ऊ दोनों के साथ होय गेलै । सब्भे सड़क नं. दस के दिश चल्लें जाय रहलें छेलै ।

रास्ता में फैसल नें फेनू वहेँ गिद्ध रों आवाज सुनलकै । ऊ सड़क नं. एक पर लगातार चीखी रहलें छेलै । जेना आपनों मालिक कें ढूँढतें रहें

सड़क नं. दस के क्वार्टर सिनी के आगू भीड़ इकट्ठा होय गेलों छेलै । फैसल पर नजर पड़तहैं ब्रेशा ओकरो नगीच आवी गेलै ।

“युसुफ भी मरी चुकलों छै” वै बतैलकै, “हम्मं गोली आरो बम के आवाज सुनी कें हिन्नं ऐलों छेलियै । हमरों साथें दानिश आरो फराज भी छेलै । यहाँ केकरौ नै पावी कें हम्मं सिनी क्वार्टर के भीतर चल्लों गेलियै तें देखलियै—झायंग रूम खाली पड़लों छै । ओकरो आगू के कोठरी के दरवाजा खुल्ला होलों छेलै । वैमें गेलियै तें देखलियै—युसुफ मरलों पड़लों छै । रसोयघर में युसुफ केरों पत्नी ओकरो दोनों बच्चा बंधलों पड़लों छै । हमरों पूछला पर युसुफ केरी पत्नी बतैलकै कि साँझे साँझ एक आदमी ऐलों छेलै । बात करतें-करतें ऊ जबर्दस्ती भीतर घुसी गेलै । पहलें तें वै ओकरा पकड़ी कें बांधी देलकै, फेनू बच्चा दोनों कें बांधी कें रोसय घर में डाली देलकै आरो ओकरो बादको खबर ओकरा मालूम नै छै ।”

ब्रेशां फैसल कें बड़ी परेशानी सें देखतें कहलकै, “हमरा सिनी तोरा तें परेशान छेलां । आखिर तोहें कहाँ छेलौ ?”

“हत्यारा कें गिरफ्तार करै लें गेलों छेलियै ।”

“की गिरफ्तार होय गेलै ?”

“हों, हौ देखों, बेहोश पड़लों होलों छै ।”

सब्भे बेहोश होलों अपराधी कें देखें लागलै ।

“हम्मं एकरा पहचानी रहलों छियै ।” दानिश बोललै, “शायत चिड़ियाघर के कर्मचारी छेकै ।”

“ओहो” फैसल रों आँख हठात सोच में डूबी गेलै ।

ठीक वही वक्ती पुलिस रों गाड़ी सिनी के आवाज सुनाय पड़लै । इन्स्पेक्टर दर्जन भर सिपाही लै कें पहुँची गेलों छेलै ।

फैसल के सामना होतहैं कहलकै, “फोन मिलतहैं हम्मं चललों आवी रहलों छियै ।”

“ठीक छै, ई रहलों तोरों मुजरिम । पहिलें एकरों हाथों में हथकड़ी डालों ।”

“मतरकि है छेकै के ?”

“अभी मालूम होय जैतों । एकरा होश में आनै के कोशिश करों । ब्रेशा, ई काम तोहीं करों । हम्मं युसुफ के लहाश देखी कें आवै छियों ।

इन्सपेक्टर, तहूँ हमरों साथ आवों, मजकि ये सें पहिलें दू सिपाही कें सड़क नं. नौ के दिश भेजों । रास्ता में कहीं हमरों मोबाइल गिरलें छै । मुजरिम रों पीछा करतें शायत जेब सें निकली गेलै । सड़क रों दोनों दिश देखतें जाय लें कहौ ।”

दू के बदला चार सिपाही कें इन्सपेक्टर नें निर्देश देलकै । दानिश आरो फराजो ओकरों साथ गेलै । कॉलोनी के कुछ नौजवानो साथ होय गेलै ।

“की युसुफ सचमुचे में मरी गेलै ?” इन्सपेक्टर नें आश्चर्य भरलें आवाज में फैसल सें पूछलकै ।

“हों, ओकरों खून होय गेलै आरो हत्यारा यहें आदमी छेकै ।” एतना कही फैसल नें विस्तार सें सब कहानी बतैलकै ।

युसुफ केरों लहाश चित्त पड़लें होलें छेलै । ओकरों आँख आचरज आरो डर भरलें होलें छेलै । ओकरा गला घोंटी कें मारलें गेलें छेलै । हौ वही लिबास में छेलै, जॉन लिबास में ऊ फैसल आरो इन्सपेक्टर सें मिललें छेलै ।

बाहर बेहोश पड़लें अपराधी कें आबें होश आवी गेलें छेलै । आरो मारथों झुकाय कें उठी बैठलें छेलै । दोनों ओकरों नगीच लौटी ऐलै ।

“तोरों नाम की छेकौं ?” फैसल नें अपराधी के ध्यान खींचतें पूछलकै । मजकि ऊ खामोशे रहलै ।

“हम्में पूछै छियौं कि तोरों नाम की छेकौं ?” फैसल नें ओकरों चूल मुट्ठी में जकड़तें होलें पुछलकै, “कुछुओ छुपैला सें फायदा नै होय वाला छौं। अधिकांश लोग तोरा पहचानी रहलें छै । कि तोहें चिड़िया घर रों कर्मचारी छेकौ । फेनू अपराधी सें सच कबूलवैवों हम्में अच्छा नाँखी जानै छियै ।”

“बतावै छियौं ।” ऊ करैहते होलें बोललै ।

“जल्दी बताव ।” इन्सपेक्टरें ओकरों पीठ पर एक लात जमैतें बोललै ।

“इम्तयाज ।”

“हूँ, तें चिड़ियाखाना में कबें सें काम करी रहलें छें ?”

“अढ़ाय साल सें ।”

“तोहें एत्ते एत्ते आदमी के खून केन्हें करलें ?”

अपराधी कुछ देर लेली सोचतें रहलै, फेनू बोललै, “तोहें हमरो दायं बाँह देखो ।” ई कही वें आपनो दायं हाथ झुलैलकै ।

“हो, ई हम्मं जानलियै कि तोरो दायं हाथ कटलो छै, फेनू ?”

“ई हाथ के काटे वाला अफजल छेलै ।”

“की मतलब ?” फैसल नें चौकी के पूछलकै ।

“अफजल आरो हम्मं, दोनो अच्छा क्रिकेट खिलाड़ी छेलियै । अफजल के सालो सें लगातार कैप्टन बनतें आवी रहलो छेलै । तीन साल पहिलें एक राजकीय मैच में हमरा कैप्टन बनाय के बात चली रहलो छेलै । आरो हमरा पूरा विश्वास छेलै कि हम्मी कैप्टन चुनलो जैवै कि एक दिन प्रैक्टिस के दौरान अफजलें क्रिकेट के बल्ला सें हमरो बाँही पर हेनो चोट करलकै कि बाँही रो हड्डी चूर-चूर होय गेलै । तखनी अफजल के पक्षे में इनायत अली आरो युसुफ खाड़ो रहलै । हमरो बाँह ई कदर जखमी होलै कि टुटलो हिस्सा में जहर फैली गेलै, जेकरे कारण हमरा आपनो हाथ बाँही तक कटवाय लें लागलै । आरो यै किसिम सें हम्मं हमेशा लेली बेकार होय गेलियै । जोंन दिन अफजल, इनायत अली आरो युसुफ नें घेरी के हमरो बाँही जखमी करलो छेलै, ऊ दिन राशिदो वही मौजूद छेलै । हमरो ऊ हाल पर वें खड़ा-खड़ा ताली बजैलें छेलै आरो आबें वहु क्रिकेट रो खिलाड़ी बनलो जाय रहलो छेलै । ई तें संयोगे छेलै कि हमरा चिड़ियाघर में नौकरी मिली गेलै । वहाँ गिद्ध रो एक प्रजाति कण्डूर सें हम्मं घुली-मिली गेलियै । ऊ बेहद समझदार चिड़िया बुझैलै । तबें हम्मं ओकरा ट्रेनिंग देना शुरू करलियै । फेनू आपनो दुश्मन सिनी के मारै में ओकरे मदद लेलियै । हम्मं ओकरो पंजा में जहर लगाय दै छेलियै आरो जोंन आदमी के तरफ इशारा करियै, ऊ ओकरा पर झपटी पड़ै ।

“मतरकि ड्रायवरें की कसूर करलें छेलै ?”

“ओकरो टैक्सी पर चूँकि राशिद बैठलो छेलै आरो गिद्ध के निशानाही वही छेलै । बस ई समझो कि टैक्सी ड्रायवर धोखाहै सें ओकरो शिकार होय गेलै ।

“जे भी हुएँ । तोहें कानून के आपनो हाथों में लै के गलती करलें छै । आबें सजाही लें तैयार रहो । तोरा माफी तें केन्हो के नै मिलें सकै

छें । एक सजा हम्मू तोरा देलें छी । तोरा गोली लागलौ छीं । एत्तें देर तांय तोरो खूनो बहलौ छीं । गोली के जहर फैली रहलौ होतै । जब तांय ट्रिटमेण्ट शुरू होतै, डाक्टर तोरो पैर काटै के इन्तजार करतें रहतै ।

“नै, नै, ई इन्साफ नै छेकै । हमरा जल्दी अस्पताल लै चलौ ।” इम्तयाज चीखी पड़लै ।

“इन्साफ के दरवाजा तौही कबें खटखटैलौ ? जहिया अफजलें तोरो बाँही घायल करलें छेलै, तहिये तोरा इन्साफ मांगना छेलौं । मतरकि तौहें खोमोशे रहलौ आरो दरिन्दा बनी कें सबके खून करतें रहलौ । इन्सानी जिन्दगी एत्तें सस्ता नै होय छै । तोरा तें मृत्यु दण्ड मिलनाहै छीं ।”

लोग एकदम्में गुम साधलें होलें छेलै । इन्स्पेक्टर, ब्रेशा, दानिश आरो फराज अपराधी कें एक टक देखी रहलौ छेलै । आरो आपनों तौर पर कुछ सोचियो रहलौ छेलै ।

आरो हुन्नं फैसल के कानों में युसुफ केरी कनियैन साथें ओकरो बच्चा सिनी के कानवों के आवाज आवी रहलौ छेलै ।

